

ASO GAFUA, 29 IUNI 2015

Na nofoia le Nofoa e le Fofoga Fetalai i le itula e 9:00 i le taeao.

FOFOGA FETALAI: Ou te faasilasila atu ua toe amataina nei Tualumaga a le Fono Aoao Faitulafono.

Ia e talitonu o le a taoto ia faaalofisa o tupu le maimoaga a le Palemene i lenei taeao fou, tutui le alofitai o Aana e tofi le oo i le vaa le uso nai le Tuamasaga o Tuna ma Fata, ia ae gafoaata o lea ua matamatanonofu le maota o Tuiaana i lenei taeao. Ia ae tatou ala mea sao ia tumu i faga le tulatala fotu'ai ai le Malietoa na to malama i Mataniu Feagai ma le Ata, ia ua faa-Ao lo tatou Alii Faaola lo tatou Malo ma si o tatou atunuu.

Ia tatou patipatia le alofa ma le agalelei o le Atua i lenei taeao fou i le alafai mai i faguga lelei le paia ma le mamalu mau'aluga o le tatou Palemene, sa tatou momoe ma manu, ua tatou alafai i manu i lenei taeao fou. Ua tatou faafogafoga foi i le Upu folafola i le aso ananafi ma le faamanatu a le au Talalelei a le Atua ma Auauna Paia a le Atua, e manatu o lea ua mafua ai ona atoa tino o le Tama i lenei taeao.

E ofo alofa atu ma faatalofa atu i le paia mau'aluga o le tatou Palemene i lenei taeao i le alafai mai i lo outou soifua manuia ma le soifua maua ua mafai ai ona toe taitaiina mai lo outou ola saogalemu ua faaauauina ai le tatou galuega i lenei aso. Malo le onosai, malo le faapalepale malo le galulue, e manatu o le uma atu foi o le tatou Fono, ia ona tatou feagai foi lea ma le tele ma le anoanoai o tuatua'noa ma tuatua'gia faale-Aiga, faale-Itumalo, faale-Nuu, faale-Ekalesia, a o le talitonuga o lo o lava le malosi i le tino le agaga ma le mafaufau e fai ai nei mea uma.

O lenei taeao e ofo alofa atu i lau Afioga i le Taitai o le Malo ma lau Kapeneta mamalu, ia ua tatou faatasi foi ma le Afioga i le Taitai o le Itu ma le Sui Taitai aemaise o le paia o lea tala na atoa i lea itu o le Palemene, ma sui usufono mamalu uma o le tatou Maota Fono i lenei taeao.

E i ai le talitonuga ua toe o se aga ona taunuu lea i le taunuuga o le tatou Tala o le Tupe o lea lava ua faasolo mai le Tali a le tatou Malo, ona faapena lea ona tatou agai atu mo le auiliiliga. O lenei itula e le mafai foi ona faagaloina le tapuaiga a lo tatou atunuu, Samoa, ia faafetai le tatalo faafetai le tapuai mai, le tapuaiga malu i Lana Afioga Mamalu, O Le Ao o le Malo ma le Masiofo, lau Afioga i le Sui o le Fono a Sui Tofia ma le Masiofo, aemaise o le paia o Samoa i ona tulaga faalupe. Le tatou Aufai Tatalo, ia malo le onosai, ou te talitonu e le o mafai ona tuulafoaiina le tatalo a le au Sa Levi, o lo o ae ai i manu le faatautaiga aua le tatou faatamasoaliiiga.

**TULAFONO TAU FAAOFI O LE FAATATAUINA O TUPE
FAAOPOPO (NU. 2) 2014/2015 MA LE TULAFONO TAU FAAOFI O
LE FAATATAUINA O TUPE 2015/2016 - felafolafoga faaauau i luga o
le faitauga faalua - Aso 6**

FOFOGA FETALAI: E tolopo le tatou Fono i le Aso Faraile, o lo o talifuaitau le Minisita mo Tina ma Tamaitai, Atinae o Nuu ma Afioga ma Agafesootai, o lea ou te tapa ai lau Afioga i le Minisita e toe faaauauina na faaiu mai le saunoaga e ala i mataupu sa laga i lauga a sui usufono.

Tulai mai lau Afioga i le Minisita mo Tina ma Tamaitai, Atinae o Nuu ma Afioga ma Agafesootai.

Tofa Hon TOLOFUAIVALELEI FALEMoe LEIATAUA (Minisita mo Tina ma Tamaitai, Atinae o Nuu ma Afioga ma Agafesootai): Ou te tulai ma le faaaloalo, e solitu foi le paia maualuga o le Maota nei i le ee o lau Afioga i le Fofoga Fetalai, afio foi lau Afioga i le Taitai o le Malo ma le mamalu o le Kapeneta, o lea foi e afio le Taitai o lena Itu o lo o agaia le Malo, faapea foi le Sui Taitai ma le mamalu o lena Itu fale o le tatou Palemene, i le afifio foi o Minisita Lagolago o lo o lagolagosua aua le Faigamalo ma le taitaiina o le tatou Malo e ala i pulega ma le faataunuuina o ona faiga faavae i Tulafono foi ma tulaga o faaiuga e faatino i le laulau a le Kapeneta. Ou te talitonu o ia mamalu ma ia sa ma paia o lo o au'afa afi lava aua le lagolago ma le puipui aemaise foi o le tui mai o le mulipapaga i le paia o le atunuu. Ia e le toe oo so matou leo lau Afioga i le Fofoga Fetalai, aua o lea ua uma ona paepaeulufanua i le tofa liliu aemaise foi le moe sasa'a i lau Afioga i le Taitai o le Maota, e faafeiloai foi i le Tafatolu o Faigamalo faapea foi le Auaigaluga Paia a le Atua o lo o latou nofo tatalo ma latou faanonomanu aua lava galuga fai a le Palemene, aemaise lava tiute tauave o le Faigamalo aua se manuia o Samoa i ana faaiuga fai, aemaise foi o fuafuuga uma lava mo le manuia o le tatou atunuu pele o Samoa.

Ona faapea lea o sa matou tala, e le toe tau oo so matou leo i ia paia ma ia sa ma mamalu, aua o Samoa o le atunuu ua uma ona tuulaupua, ua tosi faati ma mamanu faatiti o outou sa, aua lava ia tulaga o le tatou atunuu e pei ona masani ai. O lea tapuai maia se i taumafai atu foi se leo mo nisi o vaega na aafia i saunoaga a sui usufono mamalu, peitai, e ao lava ona oo sa matou faamatalaga i le tapuaiga a si ou itumalo aua lena taeao fou ma le manuia ua tatou maua i le alofa ma le tausiga a lo tatou Matai Sili i le lagi. O le paia foi o Lupesee ma Mulifusi ma Sagameauta i le afifio o le Fofogaolevai ma le Falefa o le Ailaoa, e le gata foi i lea o le Aloalii, susū Tanuvasa le Alii Matua faapea foi le nofo a fuaifale a lo outou aiga Sa Tanuvasa o le Laau na Fausia, o le mamalu lava lea aua la ouluga puipuiga o le Faleaana, a o paia lava ma sa o lea e i aao o le Toaiva ma le Matuanatogi.

Ou te fia oo foi isi ou nuu aua sa o Maauga o le malae e tasi o Aana, e faapea foi le toaiga o le Usoga a Tumua ma Pule, ae faigata foi le maota o le Tupu, le maota o Tuiaana i Nuuausala, e le faaluaina le maota lena e tasi lava o le maota i Nuuausala e tasi e afio ai le Tuiaana.

E faapea foi le maualuga o maota e fia e ee ai lau tofa le Matuanatogi, lau fetalai i le Avaganofoa o le ua e faalanu maaveave, o le Tootoo foi e tasi o Tumua aua Faafeagaiga o Tumua e fia, aua lo tatou vanonofo, i le alaatai o oe le Fale Tuiaana i lo outou Toaiva, afio foi Sooaemalelagi ma Alo o

Tuiaana Tamaalelagi, le mamalu ia te oe Polo ma Fautala o Salu ma Gatai ma le paia maualuga aua Oe Leulumoega, o le Tumua aupito sili ona silisili, tapuai maia se i taumafai lo outou sui usufono aua ia tulaga o galuega ma le filifiliga a le Afioga i le Palemia, o lea ua afea ai lo tatou itumalo e lagolagosua aua lona auvaa.

O le vaiaso ua tuanai i le Aso Faraile ua maea ona oo so matou leo i tulaga o vai tumaoti ma polokalame a lo tatou Malo aua afioaga ua uma ona lesitala mai, o lona lava ua talatala faavaatiu i tulaga o galuega fai a le Matagaluega e soosootauau ma le Komiti o lo o latou o feagai ma galuega o vai tumaoti i lo tatou atunuu, pei ona fai atu e 34 ia vai tumaoti a afioaga ma itumalo ua lesitala, e 17 ua uma ona faagaioi ma tapena e pei ona i ai fuafuaga a lo tatou Malo ia taumafa Samoa, aemaise o afioaga e aofia ai se vai mama ma le vai e faaauau ai pea le soifua maloloina, e 4 vai o lo o taumafai i lenei vaitau, 3 vai o Fagaloa ia ma le vai o Nuusuatia, o le vai o Niusuatia e pei ona fai atu ua faatagisia mai e le afioaga i Vaiee, o lea ua taumafai se i silasila pea i ai ona o tupe faaagaaga mo ia galuega, ia ua uma lava ona faataoto. Ia peitai o le tausaga lenei faaletupe o le a savalia ia Iulai seia aulia le tausaga fou, o lea ua i ai foi isi vai e 3 o Fagaloa, e i ai Uafato ma Salimu faapea foi Samamea, ia ma le vai o le afioaga o Sili i Salafai. O lona ua uma ona faailoa atu, faafetai o lea ua afio mai le sui usufono mo Palauli le Falefa e faafogafoga lelei, o lona vai ia o lea ua faagaioi. Ia na ona tatou fetogiaai faasopo tuaoi vaeane le faafogafoga a le atunuu, ae le mafai ai ona tuua le mea tou te finagalo i ai, e pau lava o lea, ia lava tupe a lo tatou Malo e faagaioi ai poloketi o atinae a lo tatou atunuu.

Ona ou oo mai lea i le Maota o Pulenuu pei ona laga foi e se tasi o toe ulutaia o lona itu aua le maota o Manutoao, ia o lea ua i ai le fuafuaga a lo tatou Matagaluega o le a tasi le maota i le nofoaga lea o lo o i ai le maota o Tina ma Tamaitai i lo latou ofisa ma le fale samoa, ia o le a taumafai lava e fai se fale lelei e lava ma totoe mo ia galuega, aua lava le mamalu o sui o nuu i a latou tuufaatasiga i totonu o Salafai e afua lea i a outou galuega e moomia ai lo tatou fonofono pea ma tatou fesilafai, e faapea foi ia le itupa o tina ma tamaitai.

Ona ou oo mai lea i tulaga o fonofono a nuu ma pulega a alii ma faipule, pei lava ona silafia pei ona ou fai atu, o lalo o le Tala o le Tupe a le Matagaluega o tupe tetele ia o lo o faatulaga o le tulaga o le atinae faaleleia ma le tuleiina o mataupu e aafia ai tina ma tamaitai, faapea foi alo teine, e le gata i lea o le pulega o alii ma faipule i totonu o afioaga, lea e i ai le Tulafono lea o le Fonofono a Nuuu, e le gata i lona e tasi lona vaega e matua sili atu i le \$1miliona po o le \$2miliona o lo o faaagaaga i ai le tulaga tau lotofale.

Aua e i ai lava le popolega o le manuia, o le faataunuaina o fuafuaga uma a lo tatou Malo e ala i Matagaluega e fia Faalapotopotoga, o lea lava o lo o faaogaina ai le auunaga a Sui o Nuuu ma Sui Tamaitai o Nuuu, ae totogi lava e le Matagaluega mo Tina ma Tamaitai. Ia, e matou te le o tapa nisi tulaga i fesootaiga ma Matagaluega ona o le tulaga e ala e tasi le mauga i Olo i tulaga o le auunaga a lo tatou Malo ina ia manuia Samoa. E le o faailogaina faapea na o galuega o feagai ma le Matagaluega, ae matou te galulue faatasi lava pei o le Matagaluega o Leoleo, Soifua Maloloina, Aoga, Matagaluega o Galuega, Felauaiga ma Atinae Eeseese, Matagaluega o Faatoaga, Matagaluega o le Siosiomaga ma tulaga faapena, o lo o tapa ai lava le galulue faatasi ma Sui o Nuuu ma Sui Tamaitai o Nuuu, ma Sui o le Malo, ae le gata i lea, o le auunaga

ina ia manuia fuafuaga a afioaga taitasi i la latou tofa ma le moe ina ia filemu Samoa e ala i Pulega faalenuu ma faaitumalo aua lava le lagolagosua i le tatou Malo ina ia manuia Samoa, ma tulai mai o se atunuu pulea lelei ma faaaloalo ma amio tausaaia tagata uma.

Ua tatou i ai foi i lenei vaitau, o lea o le a talimalo tatou i le Manu Samoa, o le tatalo foi lena, e ui ina e le i fesilafai Au nei ma Sui o Nuu ma Sui Tamaitai o Nuu, o se taimi o le vaiaso nei o le a maua ai se feiloaiga muamua ma le Tamaitai ua tofia e taitaiina le Matagaluega o le Ofisa Sili o Pulega, e ala i tofiga a le tatou Malo. O le faamoemoe ia talosagaina lava le mamalu o afioaga e afua mai i Faleolo seia oo lava i Apia i le latou lagolagosua e faatumauina pea le matagofie o Samoa i le teuteuga, ua i ai afioaga e amata mai Aana e oo i se vaega o Tuamasaga ua faatino lava le latou tofa faatamalii ma le naunauga o Samoa ia lagolago le tatou Malo e ala i ia vaega o le tatou tautua. O le mea foi la lea e tapa ai pea tulia i le tata i le tofa ma le moe i le pulega a alii ma faipule mai ia afioaga uma i le talafatai i Faleolo seia oo mai i Apia e faatino le tatou talimalo ma tulaga o le faamatagofieina o tafaala ma aai i le talafatai i le agai mai lea i Apia mo le teuteuina. Ia faatumauina ai pea le fiafia e le gata o le Olopeleki, a o alo foi ma fanau a le atunuu ua taunuu mai i le tatou tupua ma le malae aua le faatinoina o le latou faamoemoe e tauave le igoa o Samoa ina ia manuia le latou taaloga, a o lea manuia, e faamoemoe lava i le tali mai a le atunuu i le tatou lagolago e faaalua lea i le tulai faaaloalo aua le faamatagofieina o aai ma afioaga. E pei o le tulaga lena e tapa ai pea la outou lagolago ina ia tatou galulue faatasi ma maua le agaga o le siitia o Samoa i le tulaga maua luga.

O le vaega lea sa taua foi e se tasi o finagalo, o le tulaga lena, o lea ua oo i ai le matou tala, ma le vaega lava lea o lo o tapa ai se lagolago foi a le tatou Malo pei ona aafia ai foi le Faalapotopotoga Tumaoti, le Vaega lea o le Samoa Victim Support lea sa saunoa ai se tasi foi o sui usfuono o le Maota nei, lea ua uma ona tali ai le Afioga i le Minisita o lo o avea ma faa-Tama o lenei Faalapotopotoga. Ma e le na o le Faalapotopotoga lea, manatua o lea ua uma ona talia e le Loia Sili, ua tuuina atu foi i le Kapeneta lea foi Tulafono.

O le Tulafono lea o le puipuia o alo ma fanau mai sauaga ma tulaga mataga, vaeatu le faafofoga a Samoa, o lo o aafia ai lo latou soifua, o lea ua i aao o le Samoa Victim Support o se Faalapotopotoga Tumaoti lea o lo o iloga pea lo latou naunau ina ia maua le fesoasoani lea na faatinoina. Ae pei o le vaega taua lea na faailoa atu o le Tulafono lenei o le a fou mai i le Palemene, ma o lea Tulafono o le a i lalo foi o le vaavaaiga a le Matagaluega o Tina ma Tamaitai. Ma e lagona ai lava le faafetai i le fautuaga a le Loia Sili, e leai se isi e talafeagai mo lea foi vaega e galulue faatasi ai le Matagaluega ma Faalapotopotoga Tumaoti e o latou tiute ia ma faiva i le tausia ma le vaai o alo ma fanau, aemaise foi i latou e aafia i sauaga, e le gata i sauaga o le tino, a o tulaga mataga e ala i feusuaiga ma faiga faapena e aafia ai mafaufau o alo ma fanau teine po o tama foi ma o latou aiga. O le mea la lea ua i ai le Tulafono lena se i amuli se taimi ona oo mai lea i le Maota a ua ou faailoa atu, ona ua afea i lea finagalo, o le tasi lea o vaega taua o le tiute o le Matagaluega, ina ia silasila i le taua o le tausia o alo ma fanau i le Samoa Victim Support, ia ma maua le avanoa e toe faaleleia ai lo latou soifua, maua le sootaga lelei ma matua ma i latou o aiga i tulaga vavalalata i fesootaiga ina ia mautinoa e saogalemu lo latou toe foi atu i aiga.

O le mea la lea le paia e o le Maota ma lau Afioga i le Fofoga Fetalai, o vaega uma na, o lea foi Tulafono pe a oo ina faataunuuina. O le mea la lea ia tatou tatalo pea i le Atua, faatamaoigaina pea le tatou Malo i le latou silasila mamao ina ia faatupuina pea le agaga mo le puipuia o tatou aiga ma alo ma fanau e aafia i lea vaega o sauaga, e le moomia i le tatou soifuaga. E pei foi ona i ai le Tulafono e pei ona ou fai atu e faatumauiina ai pea le mamalu o le pulega a alii ma faipule ina ia usitaia e tagata soifua uma ina ia soifua manuia ma soifua fiafia Samoa e ala i totonu o afioaga ma itumalo ae le noatia ai foi le atunuu atoa.

E i ai nisi finagalo na faamamafa lava le tulaga o le afaina o le soifua ma le tulaga ua faaigoaina e i latou ua matitiva le atunuu. E pei o le faataitaiga e toaiva le fanau ae toatasi e faigaluega. E foliga mai o lo o galo i sui usufono mamalu sa faaalua lo latou atugaluga i lea vaega, e tolu ituaiga tagata faigaluega i Samoa, o le vaega foi lea o le paid employment, vaega o le self employers ma le vaega o le economically active workers. O le vaega tele lena o lea o lo o i lalo o le pulega a alii ma faipule ma tulei ai le tapenaina o le lotoifale i afioaga e ala i le pulea o alo tama o aiga e o i le maumaga e fai asiasiga ma vaai a tasi le manupapalagi poa ma le manu fafine e tausii lelei, ia lelei le vao e totonu ma mea uma faapena, e manuia le aiga. E pei ona silafia e i ai polokalame a le tatou Matagaluga i talavou, ua faatolu ona manumalo Samoa i awards a le Commonwealth, ona o le tulaga e le tuulafoaia e le tatou Malo tupulaga talavou, e ave i ai aoga, e faatino i ai fesoasoani ina ia tutupu i lo latou fatu, o i latou o le lumanai o le tatou atunuu lea e fai a latou poloketi o atinae eseese, o pisinisi, o elei, o le tulaga o le kukaina o taumafa aemaise foi o le gagauina o le vao i faatoaga o lafumanu ma togalaau fualaaaina e fai ai taumafa faisua a le atunuu ina ia aua ne i maumau lo latou taimi. O le tulaga lena o le atinae a le tatou atunuu. E le gata i lea, o le upega e faaoga e ave i le sami e le isi vaega e le faigaluega o le aiga, e maua mai ai le ia, ona aumai lea ave le vaega surplus e faatau, ae o le isi vaega e taumamafa ai le aiga i matua. Ma e faamanatu atu, e le tuua le tiute o le matai i alii ma faipule, i le vaega lea o le uunaia o le noataga o alo ma fanau ina ia galulue e le gata i le vao a o le sami.

FOFOGA FETALAI: Malie lau Afioga i le Minisita se i tuu atu le avanoa i le faauilavea a le Taitai o le Itu Agai.

Afioga Hon Palusalua Faapo II (Taitai o le Itu Agai): Lau Afioga i le Fofoga Fetalai, o se mea e fia malamalama. E faamalulu atu i le saunoaga matagofie a le Afioga i le Minisita. Ae pau lava lea ona o le mea lea sa agai i ai lau lauga, o le mativa o le atunuu.

A silasila i ai lau Afioga i le Fofoga Fetalai, o la e ua oo le suavai i le isi nuu. A o le mea lea e tupu nei, e i ai le nuu o lea ou te iloa na o le lua lava aiga o la e totoe ua tipi uma le vai o lea nuu ae na o le lua lava aiga la e ola le vai. O le faailoga lena o le le gafatia e le atunuu ona totogi o le pili o le vai, a o le vai o le matua lelei lava, manaia le vai na fai e le Malo. A o le faalavelave lena o la e feagai ma atunuu, ua taugata le pili o le vai, ua le gafatia e nai tagata...

FOFOGA FETALAI: O lea ua maua atu le Taitai o le Itu Agai.

Tofa Hon TOLOFUAIVALELEI FALEMOE LEIATAUA: O lea ua maua atu le finagalo o le Taitai o le Itu Agai, ma ou te le i tauina foi lona suafa...

FOFOGA FETALAI: Se i tulai mai le sui usufono mamalu mo Gagaemauga Nu.2.

Tofa Levaopolo Talatonu (Gagaemauga Nu.2): Lau Afioga i le Fofoga Fetalai, mo le faasaoina o le taimi o le Minisita, ona o lea ua taua e le Afioga i le Minisita le tulaga lea sa lagalaga atu ai se manatu i mea o galuega. Na pau lava le mea aua ne i galo i lau Afioga, e ese lava le economically active, ese le income o nai aiga lea sa ou fai atu ai. A e silasila foi la i le lipoti lea a le Stats, o le tele ia o le pasene o le economically inactive employment mo lou silafia. Faafetai.

FOFOGA FETALAI: Ua matuai ou le malamalama lava i le faamaninoga a le sui usufono lea na fai mai. Ou te le iloa, ua ou le iloa fetuunai le inactive ma le active lea na saunoa i ai. Ae se i saunoa mai pea lau Afioga se i tali ifo le saunoaga a le sui usufono. Tulai mai lau Afioga i le Minisita mo Galuega, Felauaiga ma Atinae Eseeese.

Afioga Hon Manualesagalala Mati Tuigamala Enokati Posala (Minisita mo Galuega, Felauaiga ma Atinae Eseeese): Faafetai lava i lau Afioga i le Fofoga Fetalai. Ua ou tulai atu ona o le mataupu lea sa laga e le Taitai o le Itu Agai i le taugata o le pili o le suavai. O le vai tumaoti e le o oo i le tulaga lea, o la e vaai e alii ma faipule, ae afai la o le Pulega o le Suavai, o mea lava ia sa lagalaga mai, ua uma foi ona faamalamalama atu. E 50 sene i le 44 kalone le tau o le vai lea e i ai. A o le tele o taumafaiga lea e fuafua e le Pulega, o le mea o le le faaogaina tatau, e tele le maumau o le suavai. O le tasi la lena galuega a le Pulega o lo o fai, o lea e fesoasoani e siaki mea ia e faaletonu aua e toatele i tatou e le o iloa ona faaoga lelei le suavai. O lea foi ua faamanino o le vai lea e vili mai lalo ua amata ona tilotilo i se faaletonu e i ai, ae ou te faafetai lava i le Afioga i le Minisita mo Tina ma Tamaitai, ona o le matou itumalo, o le 2011/2012 sa fai ai le suavai o Sataoa ua maea, le Paeaiga lenei, o Lotofaga, a o lea e faasolo atu i Niusuatia ma Vaiee, lea e faatino nei. Faafetai ua manuia le itumalo ma ua fiafia ona o tulaga ia. Ma le agaga faaloalo.

FOFOGA FETALAI: Se i avatu muamua le avanoa i le Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi (Palemia, Minisita o Tupe): Lau Afioga i le Fofoga Fetalai, o le isi matou nuu lea ou te matai ai e fai le matou vai tumaoti. O le galuega lena a le matou pulenuu e fai, e fai foi le matou fono i le Aso Gafua ona faamanatu mai lea e le pulenuu le Komiti o lea e ao totogi o vai tumaoti, ma ia faamaoni i le latou galuega. O lona uiga la, e pule lava matou i le tau o le matou vai tumaoti. O le sao lena ona o le toatele o nisi na o le talanoa ae le o malamalama, o la e lava e fai le galuega a le Komiti o le Vai e taitai ai le pulenuu i nuu nei e fai lava le latou vai. A o le tulaga lea i le tele o atinae o le

tamaoiga lenei pei o le tatou atunuu, e laitiiti lava le vaega lea e faamaumau tupe maua o a latou galuega, ae mafuli i le vaega foi lea e faalupe i le faa-Peretania o le subsistence, o le vaega lea e ola lava latou i a latou mea e toto ma maua ai lava a latou tupe. Ma le vaega mulimuli i le tulaga foi lea o lafumoā, o lafupato, e tausami ai lava latou. E le o mafai la ona faapepa uma mea na ma faaliutupe a latou tupe na e maua mai i mea e gaosi lava e latou ma faatau, e tai pei la o lenei, ua faafia ea ona e fealuai atu e taamilo o la e tuu mai niu ma faatau lau niu inu, o la e maua tupe a tagata na, ae leai lava se isi o faamaumauina ia mea ia pe a e taamilo atu i o.

O le tatou atunuu i le taimi lenei, a e alu atu nei i le taimi lenei i Aleipata, o le matua tele lava o maketi a aiga la e tutu mai i luma e faatau ai le tauaga, e faatau ai luau, faatau ai talo, o la e tele a latou tupe la e maua i ina ae le o faamaumauina. Ia se i vagana lava la le Samoa e na o le nofonofo lava i Apia ae le o alu e taamilo ma iloa ai ia le mea lea e tupu i le atunuu, le Samoa la lena e tu ae i totonu o le Palemene ia ma fai fesili faavalevarea ia o la e manatu o la e faamaumau i faamaumauga a le Statistics, e leai e le o faamaumauina mea na, e na o le pau lava mea la e faamaumau e latou, o mea ia e maoti lelei lea e totogi lau lafoga, ma fai lau NPF.

Lau Afioga i le Fofoga Fetalai o le sao lena, a ta faitau la i mea ia ona ta manatua lea, a, e i ai mea e faamaumau e atunuu nei e tai pei o tatou, a o le tele o le vaega lea e ola i le tatou economy o subsistence, o le tele lava o tagata o lea e ola mai i fua o latou taumafaiga o lo o fai.

FOFOGA FETALAI: Malie le sui usufono, se i avatu le avanoa i se tasi o sui usufono mo Aana Alofi Nu. 1, ia ona toe faasolo mai lea ia outou lea na taua le mataupu. Tulai mai se tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi.

Afioga Hon Leaupepe Toleafoa Apulu Faafisi (Aana Alofi Nu.1): Faafetai lava i lau Afioga i le Fofoga Fetalai mo le avanoa.

Ua ou tulai atu e momoli le faafetai i le Afioga i le Minisita mo Tina ma Tamaitai, Atinae o Nuu ma Afioaga ma Agafesootai, ona o le saunoaga, ia o lea foi ua malele le Afioga i le Palemia o itu ia sa ou fia tulai atu, ona o tatou o Taitai o le atunuu, e tatou te tuleia le agaga lea, aua a fua i le self employ o le tulaga la e i ai a Samoa, o i ina e sili atu le tele o tupe i lo latou ia e faigaluega i galuega foi nei tumaoti, ae afua mai i matai o le aiga ma le pulega a nuu ina ia tulei le itu lea, e pei foi o le maketi o le matou nuu la e fai i lou lumafale, ia o Fasitoo, Nofaalii ma Leulumoega, mo se faataitaiga, aua toetiiti lava tai tolu aiga ma fai le maketi. E mafua mai aisea? E mafua mai i le uunaiina lea e uunai ai faa-Taitai o Malo taitai o nuu, aua e fiu le Malo e tulei atu ae a malolo lelei lava foi le pule mamalu a alii ma faipule e le faia ni asiasiga, ia o le tulaga lena e i ai. O le isi nuu o la e ai le fuata ae le toto ulu, aua e le iloa po o fea e le iloa toto ulu, a o le meaalofa lena a le Atua e faasoloatoa, ae mafua mai ia tatou e manao e spoon feed le atunuu e fafaga i le sipuni, o le mea lena e tupu ai le mativa umi o le atunuu. E momoli atu le faafetai i lau Afioga i le Minisita faapea foi le Afioga i le Palemia, leaga o lau lea mau o la e fai i lo matou nuu,ioe, ae iloga lava le pule mamalu a alii ma faipule o lea afioaga o la e mapo ma lelei, e le o mativa taumafa lo latou nuu. Ma lou faaaloalo faafetai.

FOFOGA FETALAI: Malo. O le mea sili o lea, ia se i avatu le avanoa i le Minisita. Tulai mai lau Afioga i le Minisita mo Aoga, Taaloga ma Aganuu.

Afioga Hon Magele Mauiliu (Minisita mo Aoga, Taaloga ma Aganuu): Faafetai mo le avanoa. I le tolu vaiaso talu ai sa ou i ai i Fiti, sa lauga ai lea o le Minisita mo Faatoaga i le 46,000 o tagata Fiti la e leai ni galuega, toe o i tua e toto le kasava, ia ua tutulai ae lea o le Opposition lagolago uma. Ma le faaloalo lava.

Tofa Levaopolo Talatonu: Lau Afioga i le Fofoga Fetalai.....

FOFOGA FETALAI: Ia malie le sui usufono mo Gagaemauga Nu. 2 o lea o le a ou faauma atua le mataupu.

Tofa Levaopolo Talatonu: Na o sina tamai mea lava lea lau Afioga.

FOFOGA FETALAI: O le a avatu la le avanoa i lo outou Taitai ona tulai mai lea, tulai mai lau Afioga i le Taitai o le Itu Agai.

Afioga Hon Palusalua Faapo II: Lau Afioga i le Fofoga Fetalai o lea lava e manino le matou mataupu lea e taumafai atu, o lea e sao, o la e pala le ulu, tele le meaai, pau lava le mea lea ou te fai atu ai, o la e tatipi paipa o le atunuu, e mafua aisea? E le mafai ona totogi, a o le vai lea e i ai, o le matua lelei lava o le vai na fai e le Malo. E mafua la aisea? E mafua i le taugata, e mafua i le taugata e le gafatia e tagata, e pau lava lea o le mea lea e taumafai atu ai lau Afioga.

FOFOGA FETALAI: Ua maua le finagalo o le sui usufono. Le sui usufono mo Gagaemauga Nu. 2, faapuupuu mai faamolemole.

Tofa Levaopolo Talatonu: Lau Afioga na o sina mataupu lava lea, faamolemole lau Afioga i le Minisita, ia faafetai. Ona o lea ua malele le Afioga i le Palemia e faapea e le i faamaumau uma ia tulaga pei ona ou taua, ae mo le silafia lau Afioga i le Fofoga Fetalai, o lea sa ou talanoa atu i le Tusigaigoa foi lea o le 2011 the last faamaumauga lea e i ai a le tatou Ofisa o le isi la faamaumauga lea o le a fai i le tausaga fou, o fesili uma lava ia na avatu i tua i le mamalu o le atunuu. O le a le ituaiga mea lea e maua ai lau tupe? Faatauga o le tauaga, faatauga o le kukama, o ituaiga mea faapena. E leai lava la se mea o lilo o la e mau lelei lava i faamaumauga, ae a faapea e leai e le o sao faamaumauga, ia o lona uiga la e sese galuega la e fai.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, se i avatu le faasaoga. Ina ua aafia tatou i le Afa o Ofa, sa ou lele ai lea i le helicopter i Falealupo, ona ou alu atu lea faatonu le Helicopter se i taamilo muamua lava i luga se i ou vaai i le laufanua ou te iloa ai mea ua faaleaga ma mea o la e lelei. Ou te tilotilo ifo lelei lava i le tele o le toga taamu na ona mafuilifuli ae le faapea ua faaleagaina. Ia ona tu loa lea o le helicopter ma ou savali atu loa lea e tusa e

maua le 50 o tamaiti laiti ma le toeaina matua lava e toatasi o la e savalivali mai e le o pupula mai ia te au a o la e pupula i le helicopter, ua ou iloa lelei lava le mea la e pupula ai i le helicopter, o la fia vaai pe na matou o atu ma ni taga araisa. Ia ona omai lea o le toafa o tamaiti uu lou lima ma fesili mai, Tuilaepa o aumai ni araisa? O matou ua fa aso matou te le i aai. Ona alu atu lea o le toeaina lea fai mai, se faafetai lava i lau Afioga ua e taunuu mai, ua fa aso matou te le i aai. Ona ou fai atu lea i ai, o tala uma lava na a nai tamaiti ia. O lona uiga o le aoga lena sa e fai i tamaiti, e sau aso tou te le i aai? Se i soso mai lava, ona soso mai lava lea o si toeaina ona tuu atu lea o lou taliga ua tuu i tafatafa o lona pute, ou tago atu loa fitifiti le pute, na o le fitifiti lava pa'o tumu mai ma le manava ou fai atu, "sole o le mea lea ou te faalogo i ai o le pao maona i le fa aso i le tele o meaai. O lea sa ou vaai mai luga o le helicopter, o le matua tele o meaai la e i uta.

E i ai la le mea ua tupu, ua uma nei la le mea lena, o le alu atu lava o savali a le Malo e fesili mo faamaumauga. E sau loa le tala a latou ia, fai mai, vaai aua le tau saoa i ai mea, e le iloa pe te i foi ua toe oso mai se isi afa i le vaiaso lea le aumaia ni a tatou taga araisa i le tau saoa i ai o a tatou meaai o lo o maua i lo tatou lava malosi. O mea na o la e fai. A o le isi e alu atu loa lava le fesili foi lele, ona faapea loa lea, aua le tau saoa i ai le leai o ni tatou meaai i te i ua o le aupaka na ma talai o tatou e matitiva. Tele mea faapena lea e tupu. E amata atu lava ia i tatou nei o Samoa e tatou te iloa lava uiga o tatou tagata. O lona uiga la, o taimi uma lava ou te faitau ai fuainumera nei ma lipoti, ona ou ata lava lea ma ou mafaufau i mea ia e tutupu - ma o lea lava tatou te iloa uma o lea e tutupu, a o le mea foi a ta iloa lava o lea e tutupu, a ta saga lauga mai lava ma aumai na lipoti? O mea na o lea e tutupu.

Lau Afioga i le Fofoga Fetalai, o lau tali atu lena.

FOFOGA FETALAI: O le a avatu le avanoa mulimuli i le Sui Taitai o le Itu Agai.

Afioga Hon Aeau Peniamina Leavaiseeta (Falealupo): Lau Afioga i le Fofoga Fetalai, pei ona taua le itumalo mamalu nei, se i ou tali laitiiti atu lava, ua faafofoga lelei lava le atunuu atoa ma Savaii i le saunoaga ma tau ai Falealupo. Lau Afioga i le Fofoga Fetalai, aua o lea e silafia uma lava, e le moni a? Pei o se miti, a, pei o ni mafaufauga. O le mea la lea ou te popole ai, o le mea tonu lava lea e fau ai le faatofalaiga a le HRPP lea e fai ai le tatou Malo, na o miti ma fuafuaga imaginations, and all that, ae le moni. O le mea lena ou te fai atu ai, aua ne i aumaia nei fuafuaga ae le moni.....

FOFOGA FETALAI: Ua maua lou finagalo, se i tulai mai lau Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai o le mea e fia faasao. E manatua foi o mea ia lea e agai atu ai lauga o mea o faamatalaga nei e aoao mai, o faamatalaga nei e aoao mai e faavae i fesili, e fesili le Malo Afaatasi o la foi e fai i Aferika. O le eseese o Aferika ma tatou, a tupu se vesigai iinei i le Pasefika, mo se faataitaiga pei o le mea lea sa tupu i Fiti, ua tupu nei le fouvale lea na tupu i Fiti, tupu loa manatu o le tele o Malo, aua ne i avea ni fesoasoani i Fiti aua e avatu ona faaoga sese lea e le Malo fouvale lea e i ai.

O manatu na e masani ona tutupu. Ae sau isi mafaufauga, ia o le a afaina ai le toatele o latou tagata lautele.

E i ai le tagata mai fafo na sau fesili mai ia te au, o le a lou taofi i ia manatu? Ou fai atu, e sese uma lava na manatu, leaga e ese mamao lava manatu i mea la e tutupu i o i Aferika ma mea ia e tutupu i totonu o le Pasefika. O a mea e tupu i le Malo e faaauau lava le soifua o tagata lautele i totonu o nuu, a o o i Aferika, e tupu loa se fouvale i Aferika, e vaai atu ua faatutu fale apitaga ae sulufai i ai tagata e nonofo ai, aisea? Ua le mafai ona toe fai ni faatoaga, aua o le tagata lava e alu e fai le faatoaga e omai ia fitafita o kegi uma lava a le vaega ia ua pulea faamalosi le Malo, omai loa gaoi ae fasioti tagata, ua le malu i lalo o puipuiga a le Malo Pulea Faamiliteri ia le atunuu. O le mea lena o lea e tupu pea i Aferika, ae tuu mai nei la i le Pasefika, e leai lava se mea faapena e tupu, aisea? Aua foi e vevesi lava le Malo ia, a o la e malu lava le pulega mamalu a alii ma faipule i le faagasologa o polokalame i le totonu o mea o le laueleele ma le faagasologa o le polokalame tau faatoaga. Lau Afioga i le Fofoga Fetalai, e le o ni miti la mea na, e le o ni miti la mea ia e fai e matai o nuu, e malamalama lelei i ai matai, e le o nofononofo i le taulaga ae fai ma o auai i fonotaga a nuu.

Lau Afioga i le Fofoga Fetalai, o le mea lena lea ua tupu i totonu o nuu i tua, o le a lava le vevesi, ae alu lava le polokalame latou a pulenuu po o sui a le Malo ma alii ma faipule i le totonu o faatoaga ma mea eseese e atiae ai le soifua.

O le mea la lena, o le a le mea e fai mai ai lipoti na, a, a o oe o le Samoa, o oe o le matai e te le nofononofo iinei i Apia ma e le iloa i o i Savaii i le mea sa filifili mai ai oe ae e le malamalama la i ai le sui usufono e faapena, na ona uma lava ona filifili, ona nofononofo lava lea i Apia ae le alu e fono i fono a nuu ma iloa ai mea o tutupu i totonu o nuu.

FOFOGA FETALAI: Malie se i avatu le avanoa mulimuli lea i le Afioga i le Minisita mo Faatoaga ma Faigafaiva, ona avatu ai lea o le tali a le nofoa, ua manino ma malamalama le tatou mataupu, tulai mai le Afioga i le Minisita mo Faatoaga ma Faigafaiva.

Afioga Hon Le Mamea Lemalu Su'a Leatuavao Tuiletufuga Ropati Mualia (Minisita mo Faatoaga, Faigafaiva ma le Faleoloa o Faatoaga): Faafetai atu lava i lau Afioga, na ona faaopoopo atu lava foi i le tuleiga a le Afioga i le Palemia. O au e matua ou ofo lava i le toe lagalaga o lenei mataupu, a o lea tou te faafofoga e lua a tatou Awards ia na aumai e le Malo Aufaatasi, o le mea muamua o le Award o le Eradication of Hunger and Poverty, Aveese le Mativa ma le Fiaai, a le o se lipoti a lo tatou Malo o lipoti na fai mai fafo i suesuega a le United Nations ma latou Agencies ia a iinei i Samoa, e i ai le FAO, UNDP ma mea faapena. O le isi Award fou lea na aumai nei, ia o le isi Award na o le World Food Summit lea na fai i le 1995, 1996, ina ia oo mai i le tausaga lenei 2015 ua i lalo ifo, ua le afa ae ua afa le afa i le mea lea sa i ai muamua, ia ou te ofo la pe afai e... Se i ou fesoasoani atu lava i le afa lea na fai o Evani, ina ua uma le afa, na alu lelei lava le matou taamiloga i Samoa, o le taimi muamua lenei i le talafaasolopito o Samoa, o le taimi muamua lea ua le alu ai le araisa a le vaega lea na lau mai faapea o le a matitiva tatou. O le matua tele o meataumafa, o le talo, o le taamu ma mea faapena. O le mea lena e fesoasoani atu ai, faamolemole, e tataua ona mitamita

tatou. Na o tatou lava le atunuu o le Pasefika lea ua mauaina awards ia e lua, na o le lua isi atunuu ua maua le tasi. E tatau la ona fiafia Samoa i awards, e leai se isi o toe fia taumafa po o toe mole. O lau soso atu lea ma le faaaloalo. Faafetai.

FOFOGA FETALAI: Malo faafetai, e faamalulu atu i sui usufono mamalu o le Maota. Ou te manatu, ia outou alofagia le talosaga lea sa avatu muamua, e le toe tau faafinauina lenei mataupu, e manatu foi o lea ua taatia i lagotonu. O a foi a tatou fetuunaiga, e taua lo outou finagalo o lea ua faaalua. Ou te manatu o lea ua saunoa faalua, faatolu lau Afioga i le Taitai o le Itu Agai, o lea foi ua avatu le avanoa i sui usufono o lenei Itu. O lea foi ua faamalulu i le Afioga i le...

Afioga Hon Palusalua Faapo II: Ioe, ae le o aumaia i lenei Itu lau Afioga. O la e ave le avanoa i o ae ...

FOFOGA FETALAI: Silasila o lea ua faalua ona saunoa le Afioga i le Palemia, ua manino le tatou mataupu. O le mataupu na laga e Levaopolo, ona o le fetuunaiga o tatou faamaumauga, o lea ua manino, o lea ua saunoa faaii le Afioga i le Minisita mo Faatoaga, se i silasila la i ai? E le o ni ai avea le tau faaali mai o ni outou finagalo, o la e manino lelei lava le tatou faatulagaga. Ae ia outou alofagia, le tatou Fono o le a toso foi le laau felefele. Tolofua, tulai mai ua manino ma malamalama lau folasaga i le faamaninoga o le nofo a tolu, o mea ia e mafua ai ona maua le tamaoiga o nuu ma afioaga.

Tulai mai lau Afioga i le Minisita mo Tina ma Tamaitai, Atinae o Nuu ma Afioaga ma Agafesootai.

Tofa Hon TOLOFUAIVALELEI FALEMoe LEIATAUA: Faafetai i lau Afioga i le Fofoga Fetalai i lou toa, faafetai ua avea le tali a le Minisita mo Tina ma Tamaitai, Atinae o Nuu ma Afioaga ma Agafesootai ua avea ma mea ua lagalaga ai finagalo o sui usufono e aofia ai ma le Taitai o le Itu Agai, ae na te le i lagaina se mea. O le faatalitali ogaumu le igoa o le mea lea, ma le faatalitali manatu se i avatu mea e tali ai le Minisita ona oso loa lea faalava. Ou te matua teena le faaupuga lea fai mai e mativa le atunuu leaga e fai si matuia. E le mativa Samoa, e sese uma na mau, e le o mativa. I Leulumoega, ua pala le talo, fai o mea uma na, ua tetele povi. Silasila foi i le tulaga o le alofa o le Atua ia i tatou, o le tamaoiga o laau aina uma o lo o tatou faaogaina, e le o se mea a tatou, na o le toto lava le mea a le tagata e fai, vaeatu le faafofoga a Samoa, a o le Atua na te faatupu ma aumai fua o laau e tatau mo i tatou. O le mea lenei sa manaia ai lava le saunoaga a le Faifeau o le afioaga o Sagone, o se Faifeau e talatala lona finagalo. Fai mai lana aoaiga ia i tatou, "Ia tatou aai meaai ma le afu o tatou mata." Aua o le finagalo lea o le Atua na fai ia Atamu. Ioe, o le iuga lenei o le tagata, e ai ana meaai ma le afu, e te le maua filemu se mea. Na lauga la le Faifeau Lotu Taafili i le mea lea o le faamanuiaga e aumai i le atunuu, na lauga ai loa lea faapea.... Se alaala i lalo Palusalua...

Afioga Hon Palusalua Faapo II: Lau Afioga i le Fofoga Fetalai, o se mea e fia faasao.

FOFOGA FETALAI: Leai malie o lea o le a avatu le avanoa.

Afioga Hon Palusalue Faapo II: E faamasino mai Samoa po o le a le mea e ala ai ona tatipi paipa, e leai ni tupe, tatipi moli, o le mativa.

FOFOGA FETALAI: Malie lau Afioga i le Taitai o le Itu Agai, malie o lea ou te... Silasila foi i le... Faaauau le saunoaga lau Afioga i le Minisita.

Tofa Hon TOLOFUAIVALELEI FALEMOE LEIATAUA: Faafetai. O le tulaga lena faapea ua tatipi paipa, na oo foi i tagata o lou aiga le tulaga lena o le tatipi o paipa. O lau tala na fai i ai, tou te faatamala. Vaai outou i au pili na amata ai, na o le \$20 na amata ai, \$40, \$60, \$100, e valu lelei masina e le totogia. O le faatamala lena o le atunuu. Ou te tautala leaga o Au e togoti paipa tagata o lou aiga, o la e ua ou fai i ai, e faatamala outou, o lena e maua tupe, maua tupe, e le sese. O tagata o tatou i Niu Sila i faamanuiaga e maua, e lafo mai lava tupe i tatou aiga. O fua o faaeleeleaga ma mea toto ma mea uma faapena, o lena ou te fai atu, o le faatamala o Samoa i aiga e aafia ai. A o le tuuaiga lea faapea o le atunuu atoa, faamolemole lau Afioga i le Taitai o le Itu Agai, soia ia e te taifaafala le atunuu, soia, aua, aua e le sau faatagata ni ou mala, aua, faamolemole Palu leaga o Oe o lau uo, ou te alofa ia te Oe.

Afioga Hon Palusalue Faapo II: Lau Afioga i le Fofoga Fetalai, leaga o mea o la e tutupu, e oo mai lava i le aso, o la e tatipi paipa o nai aiga. O le upu sao lava lena. o le mea la lea lau Afioga i le Minisita, leai leaga o mea la e tutupu, o lea ou te molimauina leaga o au foi ou te taamilo ia Samoa. Tailo i ai i le taamilo a le Afioga i le Palemia ma lau taamilo lea e i ai, e taamilo atu lava i i agai i Falealili, o Safata, o lea ou te iloa mea o tutupu i nai tagata.

FOFOGA FETALAI: O lea ua maua lau Afioga i le Taitai o le Itu Agai, o le tasi lena matafaioi o le sui usufono o le togoti o paipa tipi.

Tofa Hon TOLOFUAIVALELEI FALEMOE LEIATAUA: Faafetai. O le taamilo a le Afioga i le Palemia o le silasila i mea lelei uma lava. A o le taamilo a le Taitai o le Itu Agai, na o mea leaga lava o la e alu e sue, ioe. Na o mea leaga lava o la e manao e faaoloataua le atunuu, ae Samoa, o lea tatou te le toe matitiva o la e lava e alofagia tatou e le Atua. Ia, o lea o le a tauau ina galo atu ai ma isi mea ia, sa tatau ona ou tauina atu. O le taugofie ia o le vai lea e faatino e le Matagaluga ma le Faalapotopotoga o le Suavai, ae sili ona taugofie le vai tumaoti o lo o pulea e afioaga. Na o le 50, ioe. Ae se i vaai i le tau o le 44 kalone?

Afioga Hon Palusalue Faapo II: Lau Afioga i le Fofoga Fetalai, faamolemole lava lau Afioga i le Minisita, o lo o ia te Au nei le pili a se tasi aiga, e \$6,000 ae seasea sua le vai o lena nuu i Tanumalala, na sulu mai ia te Au i se fesoasoani. A o lea ou te iloa e seasea sua le vai, e faigata ona ae le vai. Ioe. E le faapea la ou te pepelo atu lau Afioga, e \$6,000 le pili.

FOFOGA FETALAI: Ia, o lea ua maua le finagalo o lau Afioga. O lea ua maua ua tautino le solo, ae i ai foi itu tatou te faaeteete i ai. Silasila a tatou o i mea auiliili po o fea e agai mai ai le \$6,000 lea ona tatou oo atu lea i se tulaga

e sili ona le manino ma agai ai ina tele le tatou matau. O le a avatu le avanoa lau Afioga i le Minisita mo Galuega, Felauaiga ma Atinae Eeseese.

Afioga Hon Manualesagalala Mati Tuigamala Enokati Posala: Lau Afioga i le Fofoga Fetalai, o lea ua uma ona faamanino le tulaga i le tau. O le tele o faafitauli faapea, e amata mai lava i le 2002, leaga o lou Ofisa le isi o lea e oo mai i ai talosaga faapenei ma aumai ou tilotilo atu, o arrears_mai le 2000 po o le amataga o le Paeaiga lenei, ua faigata ona totogi. Ona taumafai foi lea i se auala e foia ai. O le auala la, e o le Pulega e siaki. Ia ua oo lava, o le malosiaga o le Pulega e gata i le mea la e i ai le mita, ae o tua atu o le mita e oo i maota ma laoa, o le mea lena a aiga e vaavaai ma silasila i ai. Ae ua sopo le galuega a le Pulega, talu ai le tau mataituina po o fea tonu lea e tulai mai ai le faafitauli. Ia o le isi galuega lelei lena, ma maua lea ma iloa ai, o le tele o faaletonu lea e i totonu o paipa nei o aiga. Ia ma le amata mai lava ua lima tausaga talu ai e le i totogia lava le pili. Ua oo loa i le taimi ua faigata, ona laga mai loa lea. O le mea lava e masani ai tatou, a o lea e ave agai i le Taitai o le Itu Agai ona nofonono lea ma ia ae le faia i ai se galuega lelei, aua o le galuega sa tatau ona ia faia, ave i le Pulega o le Suavai se i silasila ma fai se fofo ma faalelei. A o le suesue auala e faaleaga ai le Pulega, ia o mea na o lea e faatino. E le o se Taitai lelei la. Ma le faaaloalo.

Afioga Hon Palusalua Faapo II: Lau Afioga i le Fofoga Fetalai, e leai e le o se isi lava auala. Ona o lea e finau mai le aiga i Tanumalala lea tatou te silafia, na matou o tatala le paipa. o le faafitauli lea e tulai mai lau Afioga i le Minisita, na ala ona le totogia e nai aiga, e seasea sua le paipa. Ona o lea ou te iloina, e ae mai le suavai mai lalo i Lefaga ona sau ai lea i i, lea e tulai ai le faafitauli. O le mafuaaga lena, ua o atu soo ia te au.

Afioga Hon Manualesagalala Mati Tuigamala Enokati Posala: Lau Afioga i le Fofoga Fetalai, a le sua e le mafai foi ona taavili le paipa. Ua atili ai ona faailoa mai le le malamalama i galuega faatino.

FOFOGA FETALAI: Ia, o le itu lea sa ou liolio i ai, aua a tatou... o le mea lea na ou fai atu ai, a tatou tulituliua loa fuainumera, e i ai le mafuaaga. O lea ua saunoa, o le tasi lenei faafitauli e tatau ona avatu le fautuaga a le Maota, o paipa liki, tele tele le mea o lo o agai i ai ona o le le qualify o palama, lea faatoa pasi atu nei le tatou Tulafono e aumai ai tagata palama lelei e tau togafiti le faafitauli. Ae taoto le mataupu lea o lea ua manino, o lea foi ua saunoa manino le Afioga i le Minisita, e 50sene i le 44 kalone. O le vai lea e faatau nei le clean water, e \$10 i le 20 litre. Ia se i silasila la i le eseese? Faumuina, e i ai se isi mea e te fia fesoasoani mai ai?

Afioga Hon Faumuina Tiatia Faaolatane Liuga (Palauli le Falefa): Faafetai lava i lau Afioga i le Fofoga Fetalai mo le avanoa. O le Taitai o le Itu Agai o le Aoa Fesoasoani, ae fai mai le safiafiga a le Fai Salamo, "O Ieova o lou leoleo mamoe o ia, e leai se mea ou te mativa ai." Na pau lava le mea e mativa ai le Taitai o le Itu Agai, o mafaufauga, le lava le tofa.

O lona lua, o i i Tanumalala, o lo o i ai...

Afioga Hon Palusalue Faapo II: Lau Afioga i le Fofoga Fetalai, o le mea e fia faasao, o le mea lea e leaga ae le tu ae i luga o le sui usufono ae le o aafia ai. O oe lea na mafua ai mea ia? Ua e silafia i lou taimi? O le a fai lava fai ae na saunoaga faapena a o le ava e faifai totoe le tatou Fonotaga.

Afioga Hon Faumuina Tiatia Faaolatane Liuga: Leai, leai, e le faatotoea le tofa e fai i le fale lenei.

Afioga Hon Palusalue Faapo II: Ma le isi mea a ou tautala ona e saofai lea i lalo.

FOFOGA FETALAI: Malie le sui usufono o lea e avatu le avanoa lau Afioga i le Taitai o le Itu Agai.

Afioga Hon Faumuina Tiatia Faaolatane Liuga: E te manao ou te tautala atu? Ou te iloa lelei oe mai lou tumuai e tau i ou vae ae ou te le i tautala. Lau Afioga i le Fofoga Fetalai, leai na ona ou fia faamalamalama o le mea lea i Tanumalala. O Tanumalala, tasi lea vaega o lo o i ai lafumanu papalagi. O i foi sa tagofia ai le pili a se tasi sa i le Maota lenei na faaoga mo ana manupapalagi, o i na oso ai i luga le pili, ae le faapea o le pili o le mama. O le faaogaina, a faaoga le suavai, ua tele le tau. Ma lou faaloalo lava.

FOFOGA FETALAI: Malo. Lealailepule, o se mea tau mataupu silisili lea e te tulai mai ai?

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai, leai. Lau Afioga, o le fautuaga i le Malo ma le Afioga i le Minisita mo Galuega, Felauaiga ma Atinae Eseeese, se i alofa e aumai se alauni o lea e taamilo le Taitai o lenei Itu e alu e ao mai pili a le atunuu. Se i vaai i le tele o le galuega lea e fai? O lea faapea o lea e alu e aumai ni matou sui tauva, a o lea e alu e ao mai pili.

FOFOGA FETALAI: E manatu ua taatia i lagotonu lea fuilauvi, ua manino foi ma malamalama mataupu taua sa taumafai mai ai le Afioga i le Minisita e tau faamalamalama atugaluga. Ia e le o ni ai avea, e talitonu foi nei fesopoai tatou faamatalaga ona o mafaufauga ma fetuunaiga, ae faafetai o lea ua taatia i lagotonu.

Tulai mai le Afioga i le Minisita mo Tina ma Tamaitai, Atinae o Nuu ma Afioga ma Agafesootai.

Tofa Hon TOLOFUAIVALELEI FALEMOE LEIATAUA: Ia, faafetai i lau Afioga i le Fofoga Fetalai. Ou te tatalo atu foi ua tau galo mea na gata ai le mea. Ae le afaina, o le fautuaga i lau Afioga i le Taitai o le Itu Agai, o i ina na saofai ai le tamaloa lea ua tuumalo, le Afioga i le Aloalii. O lana upu masani i taimi faapenei, "Aua le faateia le tofa ma le moe aua na o le ia o le papau e fiti, a o le ia o le loloto, e taamilo lava ia i le sami tele." O le mea lea, aua le te i le tofa, a fai atu foi sa matou tala leaga o lea e te lagalaga mai...

Afioga Hon Palusalue Faapo II: Lau Afioga, o le mea lea e ala ai ona pisa le tatou Fono, ona o le le saunoa sao i le mataupu.... ae aua e te saunoa

faapena lau Afioga i le Minisita leaga e le manaia i le faafogafoga mai a le atunuu. E te saunoa soo lava o Oe o le Leulumoega, ae se i silasila i ua saunoaga ia e aumai? Na o ia lava o le papau lena e te nofo ma Oe.

FOFOGA FETALAI: Ia, malilie ia sui usufono e le o ni ai avea lenei taeano o lea ua faagasolo le tatou Fono, ae malie ia lau Afioga i le Minisita.

Tofa Hon TOLOFUAIVALELEI FALEMOE LEIATAUA: Ia, o le a maea le tulaga o lou toe oo i le Afioga i le Taitai o le Itu Agai, ona o lea sa saunoa nisi o sui usufono i le asiasiga lea i Tanumalala. A o le mea tonu lava lea o lea e tupu ma sese ai le mea atoa ma aumai ai lipoti sese i le Maota, ona o le alu e tauanau tagata e resitala i lalo o Ia, e i ai la le Tanumalala lena ua outou faafogoga i ai. Ae le afaina, a maua foi i le Tulafono e lelei ia aua ai ne i toe faaauaaina sou finagalo i le lumanai.

O le tulaga lea i le... ua galo lau... o lea ua ou toe manatua le lauga a si toeaia lea i le alofa o le Atua ia tatou ma Samoa, i le tele o le tamaoiga o le Atua e ala i laau ia tatou te toto ma tausii, ae na o le Atua lava e tausii ma faatupu ma aumai fua o laau eseese. O lena la na aafia ai, o le auau lena o le lauga a le Faifeau, na faapea ai, "Se i silasila tatou, silasila le faapotopotoga i le alofa o le Atua ia i tatou, silasila ua fua ulu, ua fua moli, ua fua mago, o la e foi ua fua ma povi, ia o mea uma na." Ua te i la le toeaia i le toe o le aulotu, toe faapea loa, "Oi, pei lava e sese au" vaeatu le faafogoga a Samoa, o fua na o faaeleleaga – o laau tatou te toto ma teuteu, ae na o mea lelei lava e faia e le Atua mo i tatou ma faafua mai tatou te tua i ai. O galuega na a le Matagaluega o Tina ma Tamaitai, Atinae o Nuu ma Afioaga ma Agafesootai, e auala i alii ma faipule, Sui o Nuu ma sui o Tamaitai o Nuu lea o lo o galulue ai ina ia manuia le fofoga taumafa o le atunuu. E pei foi ona saunoa le Afioga i le Minisita i le taua o nei fofoga taumafa ua tatou maua mai galuega a le Matagaluega o Faatoaga ma Faigafaiva atoa ma le lagolago a alii ma faipule e ala i le pulega mamalu a o tatou afioaga.

E le gata foi i lea e pei ona ou faamanatu atu i le amataga, e tolu lelei awards na maua e Samoa i tupulaga talavou ma a latou atinae eseese, e toalua mai Salafai ma le toatasi i Tumua nei. Ia sei silasila i le maoae i le tolu o tausaga sosoo o maua e Samoa lea award i le tulaga o le silasila mai o le Faalapotopotoga a le Commonwealth o lo o latou uunaia polokalame mo alo ma fanau ma tupulaga talavou ina ia faaoga tatau o latou taimi mo le atinae o le atunuu, e ala ia latou polokalame mo le faaleleia o le tamaoiga. E pei o tulaga na ou te matua faailoa atu ai, e taua tele le galuega a Sui o Nuu ma Sui Tamaitai o Nuu i le latou sosoo tauau ma le Matagaluega i le atiaaina e le gata o tina ma tamaitai, tupulaga talavou, alo ma fanau, polokalame o le pulega a alii ma faipule ma pulega faalotoifale. E le gata i lea o le Komiti o le Faleula i la latou galuega ma le Komiti o Pulenuu i Savaii ma Upolu, e faapea foi ia i latou e le atoatoa le malosi. O vaegatupe eseese uma na, e le gata i lena o le Fale Lomitusi o le tatou Malo, o lea foi ua i ai le finagalo o le Kapeneta i le tulaga o pili a Matagaluega, Faalapotopotoga ma tagata taitoatasi e le o mafai ona totogiina i le taimi e tatau ai, o lea ua fai ina ia fetuunai pea le Matagaluega o Tina ma Tamaitai, Atinae o Nuu ma Afioaga ma Agafesootai e ala i le Pulega o le Fale Lomitusi ma le Matagaluega o Tupe ina ia i ai se fesootaiga e totogi sao mai i faiga faa-accounting ia vaegatupe nei e aitalafu ai, pe afai e pasia Tala o le Tupe i lea tausaga ma lea

tausaga ina ia faaolaina ai le tatou Fale Lomitusi i le tele ma le taugata o mea e manaomia ai la latou auaunaga.

E le gata i lea o le tele o Faiga Palota tetele ma Faiga Palota laiti a le tatou atunuu aemaise foi o le auaunaga i le Fono a le Palemene e pei ona i ai lea auaunaga mo le faatinoina o le latou tautua e ala i mea e lolomi mo le Palemene nei ae le gata i lea o le Savali. O tulaga uma faapena o lo o i ai lea auaunaga ma le faamoemoe e galulue faatasi le Matagaluega o Tina ma Tamaitai, Atinae o Nuu ma Afioga ma Agafesootai ma le Matagaluega o Tupe mo le faatumuina o lea vaega o le latou tautua ma mea e le o mafai ona totogiina mai i le taimi e tatau ai.

Lau Afioga i le Fofoga Fetalai, ou te tautala ma le faaaloalo, ona pau ia o vaega, ae fia fai lava se faafetai i nai afioga mai le Malae Vaalele aemaise o nai nuu o lou Itumalo o Nofoalii ma Leulumoega, ua outou silasila i ai pea outou faataalolo i lea itu ma toe taliu mai foi e aofia ai ma Fasitoo uta e aofia ai ma se vaega o Faleasiu i le tulaga o teuteuga o le tatou aai, aemaise foi o le faamatagofieina o tafa ala e faailoa atu ai lo tatou talimalo, ou te momoli atu ai le faafetai i nuu uma lava o le Itumalo o Aana seia oo mai i le taulaga nei, ia outou alofagia se finagalo ua lafo atu ina ia teuteu o tatou aai ina ia atagia pea lo tatou talimalo ma tauave ai pea le suafa o Samoa, o se atunuu fai mea lelei ma fai mea fiafia ma faaosofia ai foi lagona o o tatou alo ma fanau o le a tauaveina le Fua aua le taaloga ma le Olopeleki i lene vaiaso.

O la matou tatalo, alo ma fanau a Samoa, ou te talitonu ua oo atu se finagalo o le Afioga i le Palemia o le Taitai foi lea o le Malo ma le tatalo a i matou nei, ia outou loto tetele, ia pouliuli o outou tino ae malamalama la outou silasila, ia toa outou loto ma ia tauave Samoa i tumutumumauga e i ai le faamoemoe i le tapuaiga a le atunuu. O le nofo tatalo foi a le aufaigaluega ina ia alofagia pea lo outou malosi i le tino ae sili o le agaga ina ia manuia le faamoemoe o le tatou Malo ma le atunuu atoa.

Lau Afioga i le Fofoga Fetalai, ou te faafetai foi i le tapuaiga a lou Itumalo, onosai mai, o nai vaega foi o atinae ua outou faailoa mai, leai e le i fausia Roma i se aso se tasi ae tatou faamoemoe o mea o maua e le Malo o lea e tua i ai aua le atinae o le atunuu, e le na o tatou se Itumalo a ia tatou maua pea le lagona o le onosai ma faapalepale e oo atu lava le faasoia ma le tufa. Ia alofagia e le Atua ina ia tatou maua pea le agaga o le Malo e tusa o lana Tala o Tupe ma le auau, ia tatou soifua i le tulaga o le tamaoaiga ua mafai ona tatou maua. E fua le peleue i le ie, ao le fautuaga mulimuli a Leulumoega ia te outou e faafogafoga lelei mai e i ai le fuaitau e salani uma ai mea nei, “a wise man lives within his capacity, as within his income”. O le tagata potu e soifua i mea ua ia maua o mea ua foaiina o faamanuiaga mo ia, ae aua tatou te nau-ta, ae ia tatou faanaunau pea i le Atua e fesoasoani mai i lo tatou vaivai, o Samoa o se atunuu e leai ni ana minerale, e leai sona tamaoaiga i auro ma mea faapena, ao le alofa o le Atua o lo o tatou aeae ai ma maua faamanuiaga o meaai ua foaiina e tusa ma le aso, ia tatou aai i taumafa ua foaiina mai e le Atua ma le afu o o tatou mata. Ia manatua lene poloaiga a le Alii ina ia tumau pea ma tatou iloa ai ona loto tetele ma fai le fatuaiga o le tautua ma galuegaiina le eleele ma le sami aemaise foi o atinae ua mafai ona tatou maua.

Ia faamanuia le Atua i lau Afioga i le Fofoga Fetalai, Afioga i le Palemia ma le Kapeneta, e faapea foi i le Taitai o le Itu Agai, loto tetele ma faapalepale. E faapea foi i le Sui Taitai o lene e maua....e tatau ona e faalogo i le Toeaina

matua na i ou tafatafa e ese le toa o le tai. Ia manuia la outou Vaega Faaupufai, manuia lenei Maota, e faapea foi i le tapuaiga a Ofisa Sili o Pulega o Matagaluega ma Faalapotopotoga. Ia manuia le Ofisa Sili o Pulega o le Ofisa o le Failautusi o le Fono Aoa faapea le Sui Failautusi ma le paia maualuga o le afaigaluega i ona tulaga faalupe.

Ia manuia lo tatou Itumalo i lau tapuaiga ia maua so matou malos. Ia soifua ma ia manuia.

FOFOGA FETALAI: Malo faafetai saunoa i le Minisita mo Tina ma Tamaitai, Atinae o Nuu ma Afioaga ma Agafesootai po o le tofa malele foi i lau Fetalaiga Leulumoega, talitonu ua manino ma malamalama le folasaga a lau Afioaga i le Minisita ma lau Matagaluega, afai foi ua lagalaga finagalo o sui usufono i lenei taeao e le o se mea fou, o le agaga aua tatou te nau-ta.

O le agaga foi o le taumafai mai o le Minisita e faamalamalama lana pitolaau a ia mau pea le toovae i le paia ma le mamalu o le Maota aua o aga masani lava nei. O Samoa o le atunuu tofi, ua maea ona tatou filifili ma tatou matamata i e faia upu o le atunuu, e ono lava Pule ma Tumua uma, a o se isi vaa e sii ia o le sii vale.

O le agaga lena e faafetai atu ai i lau Afioaga ae faamalulu atu foi, o le a se taumafai atu o leni itu ia lavapapale pea le Kapeneta o i ina le foeli o le tatou Sa, tele pe itiiti ia tatou logosaia pea, ae avatu lava i ina, ua saunoa foi le Taitai o le Itu Agai ua fou lana taavale o lea e taamilomilo ia Samoa atoa, e le o taamilomilo faaletonu e leai, e taua foi lana taamilomilo a ia taamilomilo pea na o Upolu ae aua nei taamilomilo atu i Savaii.

Ua oo atu nei le faasologa i le Minisita mo Fesootaiga, ma Faamatalaga Tekonolosi.

Afioaga Hon TUISUGALETAUA SOFARA AVEAU (Minisita mo Fesootaiga ma Faamatalaga Tekonolosi): Faafetai i lau Afioaga i le Fofoga Fetalaiga mo le faatautaiga o le tatou Fonotaga i leni taeao. Ia mamalu pea i tapuaiga faigata i siitaga maualuga ma ogaoga le paia sausaugata o le Palemene o Samoa ua potopoto. I le ee mai o lau Afioaga i le Fofoga o le Maota o Samoa, ua tatou faatasi le faaneetaga i leni taeao le viiga o le Atua e pei ona e molimolia i leni aso matagofie.

Afio lau Afioaga i le Palemia, lau Afioaga i le Taitai o le atunuu, afifio Afioaga i Minisita o le Kapeneta, afio lau Afioaga i le Taitai o le Itu Agai, afifio o Minisita Lagolago ma sui usufono o le tatou Maota ma lena Itu. I le taumafai e tali atu i finagalo sa faaalua e pei e foliga e mafuli finagalo sa faaalua i leni Matagaluega o Fesootaiga ma Faamatalaga Tekonolosi o le Ofisa o le Pule Faatonu faapea foi le Falemeli o Samoa sa mafuli i ai finagalo faamalo ma le faafetai. Ae i ai le finagalo faapitoa lava sa laga, ou te fia tautala faamalamalama i se tulaga puupuu.

O le mataupu na laga muamua o le talosaga i se fesoasoani mo le tau o le initaneti ina ia tau faamaualalo ai ua fai sina taugata. Ou te faamoi atu i lea vaega, ao le manulauti o le Matagaluega ina ia maua e tagata uma o Samoa le auaunaga tau fesootaiga e faatuatuaina ma gafatia ma malupuipua. O le agaga maualuga o le Malo i le Ofisa o le Pule Faatonu ma le Matagaluega, o le ofoina atu o le ofoina atu o auaunaga tau fesootaiga ma faasalalaua lelei, taugofie ma saogalemu. O nei auaunaga e aofia ai telefoni fale, telefoni feaveai, initaneti, auala lautetele o fesootaiga po o le broadband e pei ona

lauiloa ai, o televise ma leitio e pei ona faasalalauina. I le amata mai i le Malo sa faapena ona faataatitia ai faiga faavae talafeagai e limataitaiina ai le atinae o fesootaiga ma faasalalaua i le amata mai i le sefulu tausaga talu ai.

O le taimi nei ua molimauina e lo tatou atunuu suiga tetele ma le televavave, o auala fou mo fesootaiga ma faamatatalaga, e le gata i totonu o le Malo, o Faalapotopotoga ma pisinisi tumaoti aemaise ai o le atunuu lautele, Ekalesia ma atunuu i fafo. Ae peitai ane e le taugofie le aumai o nei ituaiga auaunaga e pei ona faamatuu atu ai i Kamupani Telefoni ma Initaneti. O le tulaga o atu motu e mamao ese ma atunuu tetele e moomia ai le fausia o ni auala lautetele e pei o uaea nei e taatitia i lalo o le sami po o submarine cables, e le taugofie. O lo o faaauau pea le galuega a le Pule Faatonu mo le toe fetuunaiga o tau o nei auaunaga ina ia i ai se faamama avega mo o tatou tagata. Mo le silafia e le Maota, na amata mai i le 8 tausaga talu ai o le tau o le initaneti i le tatou atunuu e USD\$2,000 i le mg e tasi i le masina ona faasolo mai lea ma pau i lalo i le USD\$1,100 i le mg e tasi i le masina, ona oo mai ai lea i le taimi lea na fai ai le Fonotaga lea sa fai mai i le tatou atunuu ma pau ai i lalo i le USD\$650 ina ua faatino le isi auaunaga o le 03B a le Digicel, o lona uiga o lo o agai pea i lalo. E maualuga le taofi o le tatou submarine cable lea o le a fuafua mo le tausaga fou o le a mafai ai loa ona matua taugofie ma pau maualalo le tau o lenei auaunaga mo o tatou tagata.

O le isi fesili sa tuuina mai o le faaaogaina o le tatou national broad band high way po o ala lautele o fesootaiga vavave faaneionapo. Ua molimauina le lelei faagasolo o le faaaogaina o le tatou atinae lenei o le broad band. O le tele o Matagaluega ma Faalapotopotoga Tumaoti a le Malo lea ua latou faaaogaina mo fesootaiga i totonu lava o le atunuu ma ua vave ai le faatinoina o nisi o auaunaga mo Upolu e aofia ai ma Savaii. Mo le silafia o le vaega muamua o le tatou polokalame lenei e le o aafia ai le fesootaiga a le tatou broad band i fafo ua na o totonu lava o le tatou atunuu, e oo mai i le taimi nei e 199 nofoaga po o Matagaluega ua faapipii ma ua fesootai i ai la tatou poloakalame lenei. E 116 nofoaga po o Matagaluega ua latou faaaogaina i taimi uma lava e oo mai lava i le taimi lenei, o lona uiga o lo o i ai nai Matagaluega po o le ono sefulu po o le fitusefulu e lei faagaoiioina pe activating i le faapapalagi, lenei polokalame mo i latou ae 116 Matagaluega ua latou faaaogaina e oo mai nei.

E i ai nai tuatuaanoa laitiiti o le polokalame lenei, o le a le mafai ona ou faailoaina atu i le Maota, o le vaega lena e ala ai ona le faapipiina ai le tatou broad band i luga o le initaneti ona e i ai itu faale-tulafono e le mafai ai ona tatou see atu i le vaega lena. O lea e i ai le faamoemoe o le amataga o le tausaga fou ona faapipii ai lea o le tatou second phase lena o le polokalame e pipii ai le tatou national broad band i le initaneti o fesootaiga ma fafo atu o le tatou atunuu. O lo o ua faagasolo nei le tauofoga mo se Kamupani latou te faatinoina ma tauaveina le tatou broad band lea ma latou pulea ma faagaoioi.

O le isi mataupu sa laga mai o le atugaluga i le televise i isi Itumalo. Ua faailoa mai e le Televise Tasi (TV 1) o lo o faagasolo la latou polokalame fesoasoani mo ni aiga i vaega uma o le atunuu o lo o fesiligia le le maua ai o le televise. Mo se faataitaiga o le talosaga a le Itumalo o Vaisigano Nu. 1, sa tuuina mai i le latou pese o le Tutoatasi.

Ua maea ona savalia e le Ofisa o le TV.1, ua mautinoa o lo o lava le malosi o faasalalaua a le televise e maua ai o latou ata manino ae peitai o le le lelei o antenna i fafo ma le tune ina o a latou televise, o le faaletonu lena o lo o i ai

o latou televise. O lona uiga o lo o faamoemoe le aiga i le antenna i totonu o le fale ae le mafai ona maua i ina ae afai le antenna i se uaea ma toso i fafo ona maua lelei lava lea o le manino. O le faaaliga lea a le Ofisa o le TV.1 i le vaega lea o lo o aumai ai e faapena foi i nai isi nuu.

Sa ou oo foi i Aleipata ona o lea sa aumai le finagalo o le sui usufono, sa ou talatalanoa i aiga e tolu ma e eseese uma lava le tulaga i Aleipata ma le latou faamatalaga lea e le ola le latou televise pe afai na o le antenna o lo o i totonu o le fale ae a toso loa i fafo ona manino lea ma maua. O lona uiga o nai faaletonu laiti na, o le isi tulaga i le taimi nei i le Bluesky ua outou silafia ua soo atoa le infrastructure a le Bluesky Samoa i nuu i tua. Afai tou te agai i polokalame e pei ona faasalalau atu e latou e mafai ona ola ai a outou televise e mafai ona maua pe afai e koneti (connect) le polokalame i le uaea a le Bluesky lea e sau i fafo. O le taimi a e maua ai lena e maua ai foi ma tatou televise i polokalame o lo o faasalalau atu.

FOFOGA FETALAI: Malie le Minisita sei avatu le avanoa i le faauilavea a le sui usufono mo Faleata Sisifo.

Tofa Lealailepule Rimoni Aiafi: Faafetai i lau Afioga i le Minisita, ua faalogologo atu i galuega ua faatino. Faafetai mo le vaega lea o initaneti atonu o le a tele se fesoasoani mo pisinisi ma le Malo i le tau e alai le toe faaaoga o le broad band. E sao lava e i ai nai puipuiga faale-tulafono ae faafetai o lea e vave tatala i le tausaga fou. O lea ua e saunoa ua faasalalau le avanoa mo se Kamupani e vaaia le sub marine cable a le broadband, sa ou faapea e build the capacity i totonu o lau Matagaluega lea o le MCIT mo lenei taimi e vaai ai, aua afai foi e tuu i tua i se Kamupani o le popolega tele lena ia tatou, aua o le mea lea na tatou puipui i ai ina ia control pea e le tatou Malo nei mea ina ia aia tutusa i ai service providers, kamupani eseese nei e tauva, aua o le mea lea na oti ai nei tatou o le deal ma le Bluesky lea na omai control le gateway na faigata ai ona alu i lalo le tau. O le fautuaga na avatu i lau Afioga pe afai foi o pisinisi tumaoti ao se itu tino e tataua ona i lalo o le Malo mo le vaaiga o tau o nei mea ina ia mautinoa e mafai ona tatou tilotilo i le tau ma aia tutusa i ai pei o le Digicel, Bluesky po o ai lava nisi kamupani e omai e faaaoga nei mea.

Ma le faaaloalo lava lau Afioga.

FOFOGA FETALAI: Malo, tulai mai lau Afioga i le Minisita e faaauau ona e tali mai.

Afioga Hon TUISUGALETAUA SOFARA AVEAU: Faafetai, e sao foi le itu lea e laga mai e le sui usufono mamalu. E le o nenefu le vaai a le tatou Matagaluega i faafitauli e pei ona tutupu mai e pei o le tatou va ma isi Kamupani o lo o latou aumaia le cable i le taimi lenei. O lo o i ai le toatuga faigata, o le mea tonu lena o lo o faatonutonu ai le tatou foe i le faavasegaina o se kamupani latou te vaaia lea fuafuaga ma ia i lalo pea o le tatou Malo le malosia o le pulega ae faatino pea le galuega i se tulaga faapisinisi ina ia mafai ona maua ai se avanoa taua.

Ona ou see mai loa lea – e pei ona ou fai atu, o le tele o le fesoasoani i le faapauina o le tau o le tatou initaneti po o le international activity lea a tatou, o lea o le a tauamo e le tatou faamoemoe ma le polokalame lea ua faataatia

nei e pei o le Samoa sub marine cable o lo o faagasolo i lenei taimi. Mo le silafia e le tatou Maota, ou te fiafia e faailoa atu o le vaiaso na tea nei na tuuina mai ai le ioega a le World Bank na faatoa talia ai le tatou talosaga sa ave i ai mo le faatupeina o lenei polokalame lea o le Samoa Sub Marine Cable, o lea ua tuuina mai le latou maliega ina ua maua mai le faaiuga a le Board a le World Bank latou te faatupeina le isi vaega atoa o le tatou polokalame lenei.

O le vaega lona lua i le tatou faamoemoe lava lea e tasi, ua maea ona fesootai uma a tatou kamupani i totonu o Samoa ma i latou e i ai lo latou naunautaiga e fia i ai i le tatou Kamupani ma o Samoa lava ia, ua toaono i latou ua ofo mai a latou tupe e fai ai ma paaga i totonu o le Kamupani lenei, ona faagasolo loa lea ma fausia ai le kamupani fou laitiiti latou te faatinoina le tatou cable. E faagaoioi e i latou i le taimi lenei, o lo o ou tauaveina pea le galuega ma le tatou komiti ma le faamoemoe e maea loa ma faatulaga le tatou kamupani fou, ua uma ona resitala le tatou Kamupani fou ma ua faatulaga uma la latou maliega ma mea faapena o lo o faagasolo nei e le tatou Loia faufautua le faatinoina o lea faamoemoe ona faatulaga loa lea. O le faamoemoe po o le masina o Aokuso ona aloaia loa lea o le faatinoina ma tuuina atu loa i le tatou Kamupani fou latou te faatinoina galuega uma lava, ona ave loa lea o le faamoemoe i tauofoga i Kamupani tetele o le Lalolagi po o ai se Kamupani latou te fausia le tatou Sub Marine Cable. O le faaiuga lea ua i ai, o le tatou cable e faapipii i le Southern Cross, o le Southern Cross o le tatou cable lea e sau i Ausetalia, Niu Sila, Hawaii, ma le main land i Amerika. O i ina tatou te pipii ai ae tatou te oso atu i Fiti e aupito sili ona taugofie ma mautinoa le tulaga lelei o le avanoa mo le tatou Kamupani pe afai latou te faaogaina le initaneti ma i tatou uma. O lena ua uma ona faatino le faaiuga e faaoso atu i Fiti agai i le Southern Cross ma agai i luga, e faalua ai ma le tatou cable lea e alu i Amerika Samoa, ona oo atu ai lea i Amerika Samoa ona faapipii lea o le ash cable o lena e alu atu sao lava i Amerika Samoa, Hawaii ma oo atu ai foi i Amerika. O le faamoemoe lena e le gata ina ia alu agai Fiti ae faapena ona oso i Amerika Samoa le hash cable i Hawaii ma Amerika. O lona uiga e lua maga ina ia faafaigofie ma aua nei i ai se faafitauli pea tupu mai se faaletonu i se isi itu.

O le faamoemoe foi o le a faapipii atu ai ma fesootai atu ai i Savaii, e fai le tatou branch atoa mo Savaii. E i ai isi atunuu o le Pasefika ua faailoa mai lo latou naunau e fia faapipii mai ia i tatou i le tatou cable, o lo o talia pea feutagaiga mo lea faamoemoe i nisi o motu o le tatou Pasefika o lo o faaalia mai lo latou naunau e faapipii mai i le tatou cable. O le amataga o le tausaga fou e faatino ai lea galuega ma uma uma ai lava ona fai isi fuafuaga ma galuega e ala i fesootaiga ma Fiti, fesootaiga ma atunuu e ave i ai ona faatinoina loa lea o le galuega i le tausaga fou. A faatino lo tatou faamoemoe lenei e pei lava ona fai atu, talosia ia mafai ona taunuu ma le faamoemoe e mafai ai ona pau le tau mo le fesootaiga ma aiga i fafo. O le faamoemoe autu o lenei polokalame, ina ia mafai ona taugofie ma gafatia e tagata uma e fia faaogaina.

O lona lua, ia vave ona taunuu fesootaiga, o le taimi nei a fai nisi gaoioiga a le initaneti e umi lava e le vave, ao le faamoemoe o le tatou polokalame lenei a uma o le taimi lava e alu atu ai e le atoa se sekone ae toe foi mai ma maua le tali mai atunuu mamao o lo o fesootai i ai.

O le vaega mulimuli e tatau lava ona pulea e o tatou tagata, ina ia mafai ona faatonutonu lava o tatou ala e aunoa ma le soona pule mai o le isi, ma isi atunuu ia latou faiga malolosi i lo tatou lava taunuuga po o fea lava tatou te o i ai ae mafai lava ona taitai ma pulea e o tatou tagata.

O le faamoemoe lena o le tatou Sub Marine Cable mo le tausaga fou, talosia ia mafai ona faataunuu e USD\$42milliona po o le USD\$43miliona le tau atoa o lea galuega, o lo o fesoasoani mai ai le World Bank, Assian Development Bank, Ausetalia o a tatou Kamupani nei e ono (6) e pei ona fai atu ai atoa ma le tatou Malo, o i latou nei o lo o fai sao i totonu o le tatou faamoemoe.

Ao lei tuua lou tulaga nei ou te faaaogaina foi lenei avanoa taua...

FOFOGA FETALAI: Malie lava lau Afioga i le Minisita ao tau faaii mai lau saunoaga...tulai mai le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, e taua tele le vaega lea na saunoa i ai le Afioga i le Minisita i cable nei o le a aumai ma maua ai penefiti mo tatou. Ae manatua foi e i ai foi faafitauli i security po o lava tapena i ai le Matagaluega, manatua foi o mea na ua faaaogaina e access ai i le internet e matua le mafaia e atunuu tetele ona taofi. Ae afai e le o sauni ai tatou ae ao ona sauni lelei i ai. O le mea lea ou te fia fesili atu ai i lau Afioga ia tatou tupe maua mai le Digicel ma le Bluesky. O lau fesili i lau Afioga pe a ou malaga i Niu Sila po o Ausetalia o lo o tufa fua ai telefoni ma credit ma mea faapena. O le a se faiga...po o maua mai e lau Matagaluega nei tupe? O maua mai se tupe a tatou i mea nei e promote i fafo lea vaega aemaise o le tatou tupe lea e maua mai e 2% i tausaga taitasi mai le Digicel ma le Blue Sky, o lau lava vaavaai i ai, e le o tele se alualu i luga pe a fua i ai i tausaga ia talu ona amata mai.

Po o tagai ane i ai lau Afioga ma le Matagaluega i le vaega lea. Ia manatua foi o le tele o tupe a tatou na maua mai i le Post Office a o fai e tatou le mea, tupe foi nei o overseas mai fafo. A o lau lava vaai pe a ou alu i fafo lau Afioga i le mea lea e tufa fua ai telefoni ma credit i fafo, ae po o faapefea ona monitor e lau Afioga ma le Matagaluega. Ma le faaaloalo lava.

FOFOGA FETALAI: Malie lau Afioga i le Minisita ua ou vaelupe le saunoaga, o le a fai lau tali pe a toe talii mai i le malologa o le taeao. Ae ou te talitonu ona o lea ua tatou taunuu tonu i le tatou taimi malolo, ua ou manatu ai o le a vavae foe ae fai se tatou malologa.

E faasilasila atu o le a faataatiaese Taulumaga a le Fono Aoa mo lana malologa masani o le taeao.

Na faataatiaese Taulumaga a le Fono Aoa mo lana malologa masani i le itula e 10:44 i le taeao ma toe amatalia i le itula 11:31 i le taeao.

FOFOGA FETALAI: E faasilasila atu ua toe amatalia nei Taulumaga a le Fono Aoa Faitulafono.

E faamalo atu le onosai i lenei vaega o le aso. Ou te manatu o lea ua tatou taunuu mai foi i le vaega lona lua o le tatou galuega faasolo e tusa ai ma le tatou polokalame. E momoli atu le agaga faafetai ma le faamalo. E talitonu ua

maua lo outou malosi e ala i le tatou malologa na fai nei, e faamalulu foi po o le a se taumafaiga a le Ofisa, o le ala lena o le naunau atu e pasia le tatou Tala o le Tupe se i aumai nisi mea feoloolo e tali ai le tou sua. A o lenei taimi, viia le Atua i kalasia ua foai, maua nai vaisalo, o niu lava o lo o ola ma laulaua i le malae i Tiafau ua talosaga i le aumaga e agai e tapena mai aua le faiga o le tatou malutaeao.

E faia le tatou malologa o saunoa le Afioga i le Minisita mo Fesootaiga ma Faamatalaga Tekonolosi, ua avanoa le Maota mo lau saunoaga.

Afioga Hon TUISUGALETAUA SOFARA AVEAU: Faafetai atu i lau Afioga i le Fofoga Fetalai, e manatu foi o lea ua faasiliina le malosi i le taliga o le sua pei ona tatou alo atu i ai i le faiga malologa, ae i ai le manatu o le a faaauau se faamatalaga puupuu o totoe. O le fesili a le sui usufono mamalu po o maua se tupe maua a le tatou Malo i gaoioiga lea o lo o faia e kamupani fai telefoni i fafo. O le tali puupuu atu i ai, ua uma ona faavasegaina tupe maua mai kamupani eseese lea o lo o faia le galuega lea, ma o ia foi tupe maua o lo o faavasegaina i lalo o le Tulafono. E le mafai ona soona fesiitai.

O le gaoioiga a i latou nei po o kamupani nei i fafo atu o Samoa, e le mafai ona oo atu i ai se tatou maemae, o le latou lea polokalame. Ae o tatou tupe maua o lo o maua mai i le taimi nei, o lo o fua i le Tulafono, ae aumai uma i totonu tala o le tupe a i latou mo audited statement accounts a latou ona fuafua lea e le tatou Regulator le latou tupe maua ma le tupe maua a le tatou Malo e maua mai kamupani. O le faiga lena o lo o fai ai nei, e fua lena i gaoioiga o lo o fai i Samoa, a o fafo atu la, e le oo la i ai se tatou malosi i le taimi nei.

FOFOGA FETALAI: Malie lau Afioga se i tuu atu le avanoa i le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, faafetai lava i lau Afioga i le Minisita. E moni a au pe afai o le mea lea e fesoasoani atu ai. Ia manatua foi o le tele o atunuu lea e i ai nei i le mea fou lea e fai nei, afai e resitala le kamupani i inei ma maua au tupe i inei, o au tupe foi o lea e maua i fafo, e tatau ona i ai se avanoa e tax ai e tatou, e tatau ona i ai se tatou tupe e maua ai leaga o la e operate i fafo, ae o lea e resitala i inei le kamupani i totonu o Samoa. O le latou gaoioiga foi la e fai i fafo, e mafua ona fai ona o Samoa, o le latou maketi foi la e i o, o tagata Samoa. E tatau lava la... o le mea lea i lau Afioga, e oo foi i le 2% lea e aumai, i lau tilotilo i ai talu ona amata mai lenei Tulafono i le 2006, e leai ma se siitaiga o le tupe lea e aumai i le Digicel. Ou te matua ofo pe afai e le o siitia fua i le latou gaoioiga lea e fai ma latou tupe maua i le tatou lea vaavaai i ai. O lo o i ai le papuipui i le Tulafono i le aia a tatou i totonu o le audit accounts, na pau le mea a tatou lea e fai, o lea na o le tilotilo i audit accounts lea e aumai, ae ou te talitonu e tatau ona i ai se malosiaga o tatou e audit ai kamupani nei, ina ia mautinoa o lo o totogi mai e latou le tupe e tatau ona maua e le tatou Malo.

O lou lava talitonuga lau Afioga, o le matua tele o tupe ia e i totonu i kamupani lea e toe lusi ma avatu i fafo, o tupe e tatau ona maua, ona o tupe a tatou lea e faaalu i aso uma. O le mea lea ou te iloa lau Afioga, o le faaletonu lea e mativa ai tagata Samoa i le toatele o tagata, o le mea lea o le credit. O tupe uma la ia o lea e alu i ai, ae se i toe mafai la ona toe auala mai i se itu e

aumai ai, e le o mativa tagata i le leai o ni tupe, ua mativa i le faaaogasese o tupe i mea nei, ae taumafai lava tatou ina ia... Aua o lea ou te tilotilo atu mai le 2006 seia oo mai i le taimi lenei, si tamai... e around \$2miliona lava tupe a kamupani nei e lua, e ova laitiiti le Digicel i le SamoaTel. Lau Afioga, pei na o se tuualalo lea i lau Afioga, se i tagai i le vaega lea, aemaise lava latou pisinisi lea e fai i fafo, e tataua ona i ai se malosiaga o tatou e maua mai ai se tatou tupe i mea ia. Ma le faaaloalo lava.

FOFOGA FETALAI: Malo. Tulai mai lau Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, e tagatasi lava Tulafono a kamupani. A faatu le kamupani iinei, na pau lava le mea e oo i ai le malosi o galuega e fai iinei, ae le oo se malosi i gaoioiga e fai i fafo, o la e foi e galulue kamupani i luga o latou foi laisene na aveane e Papua, e faapea foi i atunuu ia o lea ua galulue ai pei o Fiti. E moni sa muamua mai iinei ona agai atu ai lea i isi atunuu e pei o le tele o pisinisi ae faavae lava i luga o le faavae o lea e faatu ai tatou kamupani, o le Companies Act. O le tulaga lena o mea faapea, e leai se tatou aia atu fua i pisinisi o lo o fai e isi atunuu i luga o laisene o lo o totogi foi e latou i na atunuu.

FOFOGA FETALAI: Ia, tulai mai lau Afioga i le Minisita, e manatu ua manino ma malamalama le atugaluga o le sui usufono. Faaauau le saunoaga.

Afioga Hon TUISUGALETAUA SOFARA AVEAU: Faafetai. Ia o lena ua saunoa atu le Afioga i le Palemia i le vala lea sa saunoa i ai le sui usufono mamalu. E manaia foi le finagalo, ae ou te manatu se i vaai se paganoa i le agai atu i le lumanai e toe tilotilo ai i lea vaega ina ia toe... pe ono mafai ona toe faatulaga, ae o le tulaga lena o lo o i ai i le taimi nei, o le aofaiga o lo o tatou gaoioi ai, o lo o i lalo o le Tulafono. E le mafai la ona soona feseetaia le tatou polokalame i le taimi nei. Ia manatua foi, o le kamupani lenei, tusa o le latou lala Samoa, a o la e i o le latou kamupani tele, o le ogatotonu lena o le latou galuega, a o le latou lala o tatou. E faigata la ona tatou faatulagaina lena vaega, leaga o la e i fafo le kamupani sao, le kamupani tutotonu e mafua ai, ae o le faamalamalaga lena mo lenei taimi, ae faafetai mo le fautuaga i le agai atu i le lumanai.

Ia, masalo o lea ua maea ai nisi o mataupu sa faatulai mai. Na ona ou fia oo tasi atu lava i lou itumalo. Lou itumalo o Vaimauga Sasae, e momoli atu le faafetai...

FOFOGA FETALAI: Malie lau Afioga i le Minisita o lo o i ai le sui usufono. Tulai mai le sui usufono mo Aleipata Itupa i Lalo.

Afioga Tafua Maluelue Tafua (Aleipata Itupa i Lalo): Lau Afioga i le Fofoga Fetalai, faafetai lava i lau Afioga. Malie lau Afioga i le Minisita e le fia faalavelaveina lau saunoaga, o lea ua faamaea atu i lou itumalo. Ae malie lou finagalo ou te toe tulai atu lava ma le faaaloalo, e lua nai au mea ia sa ou taua i lau lauga faalauaitete, o le matou leitio ma le Televisi. Mo le silafia e lau Afioga, o la e ua maua uma mea ia e lua, ae na pau lava le mea lea e faaletonu e nenefu foi lea le Televisi, ae faaletonu lava le 2AP lea a tatou.

Malie lou finagalo, a maua se avanoa na o le o atu lava o le inisinia e siaki le vaega lea, ae i ai lava nai nuu o le itumalo o la e maua e pei o Tiaveauta o la e maua le isi vaega o le Televise, a o le tele lava o le itumalo e tau lava i Lalomanu na ou sailiilia, o le tulaga lava lea e tasi. Ma le faaaloalo lava. Faafetai.

FOFOGA FETALAI: Tulai mai lau Afioga i le Minisita mo Fesootaiga ma Faamatalaga Tekonolosi.

Afioga Hon TUISUGALETAUA SOFARA AVEAU: Malo faafetai. E pei ona ou fai atu muamua, sa ou taamilo ai, o lea foi la sa ou taumafai ai e tali atu e tusa ma le finagalo sa molimoli mai. E pau lau faamatalaga i ai, o lea e avatu le fautuaga sa tuuina mai e i latou e malamalama faapitoa i lea vaega. Afai e le o atoatoa, o lea foi e faafofoga mai i latou e malamalama faapitoa, ae o le a toe taumafai i ai se galuega po o le a lava se faiga e fai ai. Aua o le Televise, o lena e silafia le tulaga o le Televise, se i vagana le 2AP, e mafai ona vave oo i ai le matou pule. A o faafofoga mai le Televise, e pei lava ona ou fai atu, sa ou talanoa i aiga e toatolu i le vaiaso i ona tua pei lava o le finagalo o le sui usufono mamalu na faaalua i le Maota, na ou taamilo ai lea ma saili, o le latou faamatalaga lena, ae se i ou toe sailiili atili pe i ai se isi auala e mafai ai ona faamanino atili ia tulaga.

E pei ona ou fai atu, e leai na ona fia pai atu lava i lou itumalo o Vaimauga Sasae. E molimoli atu le faamalo ma le faafetai. Faafetai tele lava i la outou tapuaiga ma la outou nofo tatalo foi e mafai ai ona tauave e la outou auauna le galuega faatauvaa e pei ona outou finagalo i ai ou te sau ai. O lea lava o lo o taumafai pea e i ai nisi a tatou galuega o lo o fia faataunuu e pei o nai nuu sa talosaga mai i o latou auala, masalo pe toe lua vaiaso ona faagasolo atu lea o le galuega i isi afioaga na tatalo mai i le auala ma isi mea. Ia taoto mai lo outou faatuatuaga, o le a agai atu pea i ai.

O nai o tatou afioaga, o lea lava o lo o tauave le galuega e pei ona outou finagalo e faatino. Afai foi e le atoatoa, o lo o faatasi pea le Atua i a outou tatalo ma tuuina mai ai le malosi ma le malamalama e faatino ai le tatou feau nei. O le afioaga i Laulii, le afioaga i Letogo, o Vaileletai ma Vaileleuta ma Maugafiafia, aemaise foi o le nuu o Fagalii. Ia, tapuai mai, o le a faaauau pea ona tatou galulue faatasi e faaleleia lo tatou itumalo, ma aumai le finagalo o le Atua e tausi ai le toafilemu ma le matagofie o le tatou itumalo. Faafetai i lau Afioga i le Fofoga Fetalai ma le paia o le tatou Maota nei. Soifua ma ia manuia.

FOFOGA FETALAI: Malo faafetai saunoa manino ma le atoaga o le saunoaga autu i lau Afioga i le Minisita mo Fesootaiga ma Faamatalaga Tekonolosi. E le na ma se laina o Oe foi o se tasi o toe Ulutaia o le tatou Kapeneta ma Sui Sinia, malo le galue malo le onosai.

E manatu ua manino ma malamalama uma tuleiga ma saunoaga, aemaise o atugaluga sa laga e sui usufono mamalu, o outou mama na. O moomoooga alofa ia maua pea le soifua manuia aemaise o le feagai ai ma le tauaveina o le tatou Matagaluega, aemaise foi o Ofisa Sili o Pulega o le Matagaluega o Fesootaiga ma Faamatalaga Tekonolosi. Malo le onosai. Faafetai e le faigofie la outou galuega e tatalo pea i le Atua ina ia faamanuia ina ia papaaveloa le faatinoga o lenei auaunaga taua i lo tatou atunuu. Ua le gata i aoaoga, o le

soifua maloloina, aemaise o le logologo puialii o le tatou atunuu i mea e tulai mai i lea taimi i lea taimi. O ou mama na aua le faaauauina o le galuega.

Ua tatou taunuu mai i se tasi foi o Matagaluega, o lo o tulai ai le Toe Ulutaia o le tatou Maota nei. Tulai maia, o lea ua tatou taunuu mai i le Matagaluega o Tupe Maua a le tatou atunuu.

Tulai mai lau Afioga i le Toe Ulutaia o le tatou Palemene lau Afioga i le Minisita mo Tupe Maua.

Tofa Hon TUILOMA LAMEKO (Minisita mo Tupe Maua): Faafetai lava i lau Afioga i le Fofoga Fetalai. A o le i faia se manatu e faatulou atu i le paia o le Maota. O ia lava na fili mai, a o lea ua... ia, le paia ma le mamalu maualuga o le tatou Palemene. O le a le oo sau faamatalaga i tulaga i paia ma mamalu masani o le tatou atunuu, aua ou te talitonu ua nofo fale ia Satuiamaa le mamalu o le tatou Palemene.

Ae o le taimi lenei e fia fai se faamatalaga e faatatau i le tatou Tala o le Tupe. I le tala atoa i saunoaga uma a sui usufono na faaali o latou manatu e faatatau i le Matagaluega lenei o Tupe Maua, masalo o lena tou te silafia. E leai lava nisi na fai ni o latou manatu e faatatau i ni mea o faaletonu i le Matagaluega o Tupe Maua. Ma o se faafetai foi lea ia te Au, ona e maitauina, o lo o lagolago e a outou Afioga i sui usufono mamalu o le Palemene, le tulaga o lo o faagaoioia ai le tatou Matagaluega o Tupe Maua. E le o po se lilo i le tulaga o le Matagaluega o le fatu lenei po o le io lenei o tupe maua o lo o faamoemoe i ai le tatou Tala o le Tupe.

O lea ou te vaai atu i le Tala o le tupe, e tusa ma le \$531miliona tupe e masani ona maua i totonu o le tatou atunuu. Ae mai i lea tupe e sili atu i le \$470miliona o lo o aoina e le Matagaluega o Tupe Maua, ma o se galuega tele lava lea o lo o i ai. Ma o le fatu foi lena o lo o faagaoioi ai le Matagaluega lenei o Tupe Maua ia iloa lelei e le aufaigaluega. E tele semina, o mea i tulaga tau aoaoga, o le auina atu o le aufaigaluega i atunuu i fafo, ona o le agaga e tasi, ia matua silasila totoa i le tulaga ia mafai ona maua uma a tatou seleni, aua o i lava le faatuatuaga o le mea e maua ai tupe, e faagaoioi ai a tatou poloketi po o fuafuaga uma a le tatou Malo i a outou saunoaga i le Tala Autu o le Tupe.

E i ai nisi e pau lea o le mea sa laga mai, na faapea mai se tasi sui. "E tataua ona vaelua le Matagaluega lenei, e ese le vaega o le Custom ese le vaega o Income Tax Return." E i ai foi le taua o lea agaga sa faaalua, ae pau o le mea e tasi e pei ona silafia. A o lei toe faia le reformation o Kamupani ma tatou Matagaluega, sa faapea ona fai. Sa ese lava le Matagaluega e faia pepa o Income Tax Returns ese lava le Matagaluega sa feagai ma le aoina o tiute o oloa mai le uafu. Aepeitai ane ina ua fai le fetuunaiga foi i lalo lava o fuafuaga a le Malo, ona fai ai lea o le manatu e sili ona tuufaatasi. E i ai le taua foi o le tuufaatasi ina ia mafai ai ona iloa lelei ma vaai lelei e le gata i le Matagaluega ae faapea foi ona fesoasoani i le Kapeneta i le mafai ona vave logo i ai o le tulaga o tupe maua mai lea taimi i lea taimi. Aua e moni lava o lea ua fai le tatou Tala o le Tupe, fai le budget e agai i ai, ae o le faamoemoe e tasi lava ina ia mafai ona achieve ia budget nei o lo o taumafai. O le tulaga lena o lo o i ai nei, ma e faamalie atu o le a aumai pea le agaga lea se i toe vaai agai i ai, ao lea ua ou fai atu o le tulaga lea sa masani ai i totonu o le tatou Matagaluega o Tupe Maua.

O nisi foi o tulaga o lo o i ai i totonu o le tatou Matagaluega, o le aoaoina ia o tagata aemaise lava o tagata mai fafo e i ai o latou fesootaiga ma le tatou... mai Niu Sila fesootaiga ma le tatou Matagaluega e faia a latou conference ma mea i i, ina ia aumai ai ni... o a ni mea o lo o faaletonu i totonu o le Matagaluega, e mafai ona vaai i ai ma fai ni suiga e talafeagai i le Tulafono mai lea taimi i lea taimi.

I le agaga i le vaai i le Budget. O se Tala o le Tupe ua faia ma le faaeteete. Ua faia ma le fuafua lelei ina ia mautinoa lelei o gafatia e tatou tupe maua i lea taimi ma lea taimi, tupe ia ua lavea i totonu o le Tala o le Tupe, o lona uiga o se fuafuaga lelei ma le faamoemoe o le Malo i le vaai i le tulaga o i ai ina ia mautinoa, o lo o talafeagai le tupe maua faaaoga o le tupe maua mai lea taimi i lea taimi.

Lau Afioga i le Fofoga Fetalai faapea sui usufono mamalu o le Maota, e pei ona ou taua, e leai nisi na... e pau lava lauga o lo o i ai o le faafetai agai i le Matagaluega. Ma e avea ai lenei taimi ou te faafetai atu ai ia outou Afioga, i e na latou faafetai i le galuega fita na feagai ai ma le Matagaluega aemaise o le afaigaluega. E i ai lava sasi i lea taimi ma lea taimi e le faapea e... a o le tulaga lava ia i le faagaoioiga o galuega a le Matagaluega, o lona ua maitauina i totonu o lo outou mamalu. O le mea la lea, e leai se tulaga o faapopoleina ai i le tulaga i mea tau tupe, aua o lo o faia ma le mautinoa lelei, ia latalata lelei le taimi i le tupe o lo o fuafua mo le Budget mo le Tala o le Tupe ma mea o lo o lavea o lo o fuafuaina i totonu o le Tala o le Tupe a lo tatou Malo.

O lau faamatalaga puupuu lea e pei ona ou fai atu e leai ni mea e tele na laga e sui usufono mamalu o le Maota, vagana ai nai faamatalaga puupuu na fai aemaise o le faafetai i le Matagaluega ona o le faataunuina o o latou tiute. A o le i faauma atu sau faamatalaga se i oo atu sau faamatalaga i le matou itumalo o Falealili, o lea ma te toalua ai ma le tofa ia Tusa.

Le paia e o le afio o Alalagafa ma le la Nofo, Tauagaeseese ia Falealili vaeatu le paia maualuga o lo o sasao nei, o le tulaga i le tatou... taalo faatamalii, aua le faia le taaloga lenei... aua o le taaloga o le faiga palota o le suega o le tofi, o le taaloga a tamalii. A ou tautala i tulaga tamalii ona e le i latalata mai lava se isi o outou ia te au. A o tagata foi ia na matou o e le o ni tamai tagata. O lona uiga la, a le malamalama outou na, ona fesili mai lea ia te au. A o lea ua ou tau atu o le taaloga faatamalii. E leai se isi e soona faia ni mea i totonu o le tatou itumalo. E fai faatamalii le taaloga. O la ua uma ona tofi i luga. O isi o tatou e tele lava mea e alu ae le valaaulia. Ona faapea atu ai lea ia Falealili, o le falemai e le... e i ai le mai na aumai mai tua. E sue atu e leai se taavale, o le mea lea afai e lavea i Falealili, alolofa e vaai ane la, o lona uiga e lavea ai foi ma nisi itumalo.

O le isi foi tulaga i Falealili, o Falealili e tele le talo lea e sau ai, e le latalata lava i ai se itumalo. O le itumalo e pito tele le talo lea e sau ai. O le mea la lea ou te faapenei atu ai, i le mamalu i lau Afioga i le Minisita, faafetai tele i lau Afioga i le Minisita mo Faatoaga manaia le agai i luma o le tatou fuafuaga mo a tatou faatoaga. Ae pau lava le mea e tasi, se i vaai ane pe le mafai ona fai se... aua o lea ua i ai o tatou fale i Niu Sila. Aua e tataua ona fai lelei se tatou... e pei o aso ia a o le i leaga le talo, fai lelei ai, avatu ai a tatou container o le talo, ua ave ma faatau ai i Niu Sila e tatou lava tagata. O lau lea fautuaga i le mamalu o le tatou Minisita o Faatoaga. E tasi le mea o lo o faaletonu i Falealili, o auala galue lau Afioga i le Minisita, se i e tagai ane, o

le itumalo e tele, e tele foi lona sao i totonu o le tamaoaiga o le tatou atunuu, e ala i galuega ma faatoaga.

Lau Afioga i le Fofoga Fetalai faapea sui usufono mamalu o le Maota, e pei ona ou fai atu e leai ni mea e tele na laga i le Matagaluega. O lea ou te faapea atu ai, ia manuia tele le alo atu i fuafuaga uma aemaise o le tatou faiga palota. O le a ou toe fai atu, o le taaloga faatamalii. O si au faamatalaga lea.

Ia manuia tele lau Afioga i le Fofoga Fetalai, manuia foi le Afioga i le Palemia ma le Kapeneta. Manuia tele a outou Afioga, aemaise le sauni atu i le tatou faiga palota. Manuia lenei aso.

FOFOGA FETALAI: Faamalo saunoa faamalo fetalai i lau Afioga i le Minisita mo Tupe Maua. O lea lava ua manino ma malamalama le faafofoga le tatou Maota i lenei taeao. O lea sa taumate i le ete. Ia malilie le sui usufono mo Faleata Sisifo ma le sui usufono mo Gagaemauga Nu 2, e sese a oulua mate. O lea ua tatou faafofoga i le taeao nei, o lea lava e malosi le Tama Matua ia Tuiloma e agai i le palota, ae faatamalii, o le auga lena o le lauga a le toaina. Ia matou ofo alofa atu ia maua pea lou soifua manuia i lau Afioga i le Minisita mo Tupe Maua, e sao lava oe, o le ponati lea ma le io lea o le tamaoaiga o lo tatou atunuu, o le Matagaluega o lo o feagai ma lau Afioga i le Minisita.

E momoli foi moomooga alofa i le Ofisa Sili o Pulega o le Matagaluega ma le aufaigaluega, ia faamalo, o outou lea o le aufaresaio, le autusiupu ma le au ao lafoga, o la outou galuega o le agai e koleti mai a tatou tax i totonu o le Malo e agai e fau ai a tatou atinae. Ia o manu na lau Afioga i le Minisita.

Lau Afioga i le Sui Palemia ia tulai maia lau Afioga i le Amomua a le Tuiatua, o lea ua tulalata i le saunoaga a le Afioga i le Palemia, ia ua oo tonu i le Matagaluega o lo o nafa ma fitoitonu ma lau Afioga.

Tulai mai lau Afioga i le Sui Palemia.

Tofa Hon FONOTOE NUAFESILI PIERRE LAUOFO (Sui Palemia; Minisita mo Pisinisi, Alamanuia ma Leipa): Faamalo faafetai i lau Afioga i le Fofoga Fetalai mo le faatautaiina o le tatou Fonousu. Ua faamalo foi le faapalepale mo le tau faafoefoaina o le tofa tatala ma le faautaga oo i Afioga i sui usufono mamalu o le tatou Maota nei.

Ia ua afio foi le maualuga ma le maupuepue o lenei Maota, i le afio o le Afioga i le Palemia o le Taitai o le Malo, faapea sui usufono mamalu o lenei itu, ia le Afioga i le Taitai o le Itu faapea foi sui usufono mamalu o lena itu o le malu, faamalo le faapalepale, faamalo le saunoa.

I auauna filifilia a le Atua o lo o galulue i so o se tafa o Samoa ma atunuu mamao, malo tapuai faafetai le tatalo ma le galulue e tusa ai ma lo outou valaauina, ua faamalo.

Lau Afioga i le Fofoga Fetalai, ou te manatu o faalupelupe ma faalagilagi o le atunuu o le a faataalolo atu, e i ai le talitonuga ua maea ona fatu e pei o titi o tausala, ua maea foi ona tutu le atutee ma papae le atulago e pei o sa o le vavau, ia ona ou manatu lea, ia o le a tofafa ia le laau ma ona lau.

Ua faafofoga lenei Maota ma Samoa i lauga i Afioga i sui usufono mamalu e tusa ai ma le Tala Faatatau Autu o le Tupe, ia o nisi foi o sui usufono sa sausaunoa i ni mataupu e fitoitonu i lenei foi vaega po o le Sector, ua faamalo faafetai, ma o upu lava foi e masani ai failauga, o le atunuu, o lele ua talatuu nei le tafaoga ae faaifo i atimalie saunoaga ma fetalaiga paia, ua fesootai foi

taiao aua ua tala i tuavalu lau o le fo, ia ae ua faapea foi ona sii le vaatele ae tau i lona papa tuloto, ua ae foi seuga a tautai ae ifo tuamafafilimalae vagana paia ma fofoga lafolafola e tusa ai ma le Tala o le Tupe, e pei ona folasia mai i le Tala Faatatau Autu o le Tupe 2015/2016.

Ia o le upu lava o faifaiva o tama ua o se togi i lagatila ae ua faapulou tualima, ua faamalo saunoa. O fautuaga lelei uma, e faamauina mo le agai i luma e fatufatu ai foi manatu ia ma ni fuafuaga mo le faagasolo i luma o Matagaluega foi o lenei Sector.

O Tala o le Tupe lau Afioga i le Fofoga Fetalai, e le tau faaleoa tulaga pei ona i ai, o lea ua sausaunoa nisi o uso a Minisita i tulaga foi o lo o faapena ona fesootai ai ma lenei foi Sector, i tulaga o galuega ma atinae faatino, i atinae fuafuaina a lo tatou Malo, ia e faapena le tulaga o lo o i ai o lo o faataoto mai totonu o le Tala o le Tupe, tupe o le a faaaluina aua atinae fou ma atinae faaauau.

E i ai la le manatu, o vaega uma ia mo le faagaioiina o le tatou tamaoaiga ma le atinaeina o le atunuu, ia e fesootai ia tatou vaega eseese po o sectors eseese i totonu o le tatou Malo - ma o atinae nei e maua ai galuega a i latou o lo o fia maua galuega i le silasila i ai ma le vaai i le tulaga o le aoatetele ia e faapena, e le galueaiina e faapea e na o le tasi lava le vaega na o latou e galulue felagolagomai e fesootai o lea Sector, ma lea Sector, ma lea Sector, o le tuufaatasiga i lona aoatetele, ia o i ina e fua mai ai ia tulaga o galuega ma le alualu i luma o le lelei o le tamaoaiga faapea se manuia lautele o tagata o lo tatou atunuu.

Tupe e fesoasoani mo fale gaosi oloa, fesoasoani a le Malo i le Private Sector, o latou ia o kamupani o lo o ua i totonu foi o le Tala o le tatou Tupe e pei ona opea nei i le Maota. O tulaga o fesoasoani mo le auina atu o oloa ma le faatauina atu o oloa i fafo, ia e faapena o lo o galulue soosootauau le Malo e ala atu i le tatou Matagaluega o le MCIL ma isi Matagaluega i totonu lava o lenei Sector, ia faapea vaega tumaoti o pisinisi.

O se tala fiafia o le lipoti a le Faalapotopotoga o le SAME po o le vaega gaosi oloa ma faatauina atu oloa i fafo i a latou lipoti ua faalauiloaina, ua maitauina ai le siitia i luga o nisi oloa e faatauina atu i fafo i le 100% talu mai ia le faalauiloaina o latou oloa sa faia i Niu Sila, Ausetalia ia faapea Amerika Samoa i le masina o Aperila na se i mavae atu nei, O se tala fiafia lea i le tulaga ua i ai ia le vaega o le au gaosi oloa ma le aufaipisinisi.

O nei polokalame faalauiloa, o lo o lagolagosua ai le Malo e ala atu i ana polokalame o lo o i ai foi seleni i totonu o le Tala o le Tupe lenei, o polokalame ia faaauau mai lea tausaga i lea tausaga, e pei o le polokalame o le PSSF, o i sa faatupe ai foi le tele o isi vaega mo faaaliga oloa sa faatino i fafo. O le polokalame lava lea e tasi, o lo o faapena ona lagolagosua ai ma fesoasoani i tulaga o faletalimalo o le atunuu, faletalimalo fou faapea ia faletalimalo o lo o faaauau i isi tulaga toe faafoeina ma isi vaega e toe faaleleia atili, o i ina e maua ai galuega. O le mafuaaga lea ma le uiga o le faamatalaga lau Afioga i le Fofoga Fetalai, o galuega uma ia lelei a le Malo o lo o faatino e maua ai galuega a latou o lo o fia maua galuega. I le vaega o lo o fesootai ai foi ia le vaega o pisinisi ma faatoaga o le aufaifaatoaga laiti ma le aufaifaiva, ia o le vaega lea o lo o faalagiina nei o le Informal Sector, o latou ia o lo o galulue foi le Malo e fesoasoani malos i ai e ala atu i le polokalame a le SBEC, o le taimi nei e 300 le aufaifaatoaga o lo o lesitala i le polokalame a le SBEC, o le polokalame lenei na faatuina masalo ua savalia

nei le 20 tausaga o le polokalame faifaatasi a le Malo Aufaatasi o le Malo o Samoa ma le Malo o Niu Sila, faapea foi ma le Malo o Ausetalia. O i i le vaega lea pei ona fai atu, o lo o galulue fesootai ai foi pisinisi ma latou ia ona o le tele o le isi vaega lea o lo o gaosia oloa aemaise lava oloa taumafa o lo o faamoemoe foi i le aufaifaatoaga.

E le toe agai i le itu lena ua uma ona saunoa le Afioga i le Minisita mo Faatoaga ma Faigafaiva i na foi vaega uma, ae o lo o manaomia pea i le tulaga faatuputupulaia ma le siisii atu i luga o oloa e faatauina atu i fafo, e faapena foi ona siisii i luga le manaomia o fua o faaeleeleaga o lo o faaaoga e o tatou fale gaosi oloa nei. O le faatuputupulaia o nei vaega uma, ia o lo o faapena foi ona faaopoopo ai avanoa faigaluega mo tagata o lo o fia maua galuega - ma o se tulaga lelei foi lea ua ausia e le tatou Malo e ala lea i le faiga paaga faatasi ma faipisinisi tumaoti o lo o i tua o le Private Sector.

E sao ia saunoaga i le tulaga o le koko tulaga lelei ua ausia foi e le koko i lenei vaitaimi, o lea sa saunoaina le tulaga o le sukalati foi lea e gaosia i Niu Sila e le kamupani o le Whittakers, ia o au foi ia na ou maua le tala i le taimi na ou faalogo muamua ai i le sukalati lea. na ou afea Aukilani sa ou saili ma sa ou faatauina ai foi se sukalati i le ituaiga lea, o se tulaga foi lea e lagona ai foi le fiafia ona o lo o aumai lava ma tusia i luga o le pepa o lo o kava ai le sukalati lea, o le koko o lo o gaosia ai le sukalati, o le koko Samoa, o le koko mai Samoa. O le lelei lea o tulaga ua oo atu ai foi taumafaiga a lea foi itu a lea vaega mo le aoina atu o le koko Samoa i fafo mo le gaosiga o le sukalati. Ae ia tatau foi ona ou faamanatu atu lau Afioga i le Fofoga Fetalai, o lo o i ai foi nai kamupani i inei o lo o taumafai foi le faiga lava lea e tasi, ua silia nei tausaga ua taumafai pea ia se tasi o kamupani Samoa e gaosi le sukalati i Samoa nei e faaaoga ai le tatou koko Samoa - ma o le tele foi o le isi vaega o le koko lea o lo o ua saunia lelei ma tuu pepa lelei i mea o plastic mo le faatauina atu i maketi i fafo - ma e maitauina foi se tulaga lelei o lea vaega, o tulaga uma ia o lo o maua ai ia galuega a nai o tatou tagata.

O le mea lava e tatau ona agai foi i ai se faamatalaga o lea foi sa saunoa ai ia nisi o Afioga i Minisita ma le Afioga i le Palemia, o tatou faatoaga, ia e tatau lava ona tatou taumafai e liliu a tatou mindset i mea nei o faatoaga ma pisinisi, e tatau ona vaai i faatoaga o pisinisi ma galueaiina faatoaga o ni pisinisi, a o lea tala e le o se mea fou foi, ua leva lava ona tulai mai sa i ai foi nisi o tamalii iloga o le atunuu sa galulue mai i tulaga o faatoaga ma avea ai o nisi iloga o le atunuu i le tulaga o le lelei o le tamaoiga ona o faatoaga lava e mafua mai ai. O tulaga la ia e tatau ona tatou agai pea i ai, o lea la e i ai polokalame ia fesoasoani a lo tatou Malo e auala atu i le SBEC, o le PSSF, ia ma isi lava polokalame o la ua silafia e le aufaifaatoaga e faapea foi le aufaipisinisi laiti. A silasila lau Afioga i le tulaga e i ai ia le mea lea sa saunoa ai se tasi o sui usufono i le taumafa lea o le chips, o se tulaga lelei foi lea ua i ai, sa i ai se kamupani fou o lo o mafai ona fesootai ma se kamupani tele i Ausetalia e faatauina atu ai chips, chips gaosi, ia ma o chips nei e saunia mai i talo, fai, talo palagi ma isi ituaiga fai uma a lo tatou atunuu. Ia o se tulaga lelei foi lea tulaga ua ausia e latou...

FOFOGA FETALAI: Malie lau Afioga i le Sui Palemia, se i tuu atu le avanoa i le faauilavea a le sui usufono.

Tofa Aveau Tuala Lepale Niko Palamo (Faleata Sasae) Faafetai lau Afioga i le Fofoga Fetalai, o lea ua saunua le Afioga i le Minisita po o le Sui Palemia foi i mea ia o faatoaga aemaise la i mea ia o chips. O se manatu, po o ua faataga le chips fai foi lea po o le fai i o i Ausetalia aua o lea ua taua Ausetalia, ae oo foi i le isi vaega, pe mafai ona toe tagai ifo le Matagaluega i fesoasoani foi ia i tagata faifaatoaga ia e mananao e aumai ni mea foi ia o meafaigaluega e faafaigofie ai le faiga o faatoaga ia e saunua i ai le Afioga i le Sui Palemia, ma le faaaloalo lava.

Tofa Hon FONOTOE NUFESILI PIERRE LAUOFO: Faafetai lava lau Afioga, ia o tulaga ia o chips ua vela ua saunia lelei ma faavela lelei i tulaga ua saunia o tulaga na o lo o i ai tatou chips ia o lo o faatauina atu i fafo ma o lo o taliaina foi. O polokalame na e te fesiligia pei ona ou taua, o lo o maua atu nisi vaega i lalo o le PSSF, e le o maua uma la equipments ae i ai la nai mea laiti na ua mafai ona fesoasoani atu ai le Malo, a o lo o i ai ia tulaga o lo o faatalatalanoa pea pe mafai ona tatala atu i nisi vaega, ae o lo o i ai ia isi foi polokalame e pei o le faaitaiga o le duty concession, o le duty concession o lo o mafai ona aoina mai ai pe a faapea e agavaa ai lau kamupani i lalo o le tulafono, e le totogia ai le tiute foi lea i le aumaiga o equipments o masini ia e gaosi ai oloa, faapea foi isi ituaiga oloa e fia auina mai fafo, pei la o mea fau fale e faaoga mo faletalimalo i i le Tourism Sector. O lo o i ai uma polokalame na a le Malo o lo o faagaioi i le taimi nei e fesoasoani ai i le tatou Private Sector po o le aufaipisinisi, lena la o lo o maua ai ia isi foi galuega faapoopo. O le mea e sili ona taua ma sa maitauina foi i faaaliga oloa ia sa faatino nei i fafo, e i ai ia oloa e manaomia tele i fafo, ae le o mafai ona supply atoatoa e tatou ona e fai sina tele o le maketi, a aumai la le oka, e fuafua atu i le tulaga lea e i ai nei, e le o mafai la ona faamalieina le manaoga a le maketi, o le mea lena o lea foi o lo o galulue ai, e soosootauu ma le Sector lea o le aufaifaatoaga, i le latou foi taumafai mai i le latou pitolaau i le gagauina o le vao ma le totoina o tatou faaeleeleaga aua la fua o faatoaga o lo o manaomia ia mafai ona faamalie maketi nei.

Lau Afioga i le Fofoga Fetalai.....

FOFOGA FETALAI: Malie lau Afioga i le Sui Palemia, se i tuu atu le avanoa i le sui usufono mo Gagaemauga Nu. 2.

Tofa Levaopolo Talatonu: Lau Afioga i le Fofoga Fetalai, e faafetai atu i le Afioga i le Sui Palemia. O le mataupu lea sa ou laga i mea lava ia o fesoasoani ma tulaga o oloa gaosi, lea ua saunua le Sui Palemia i le tulaga pe afai e agavaa i lalo o le Tulafono mea ia pei ona taumafai atu ai se tasi o sui usufono i incentives mo le taumafaiga lea o le tatou atinae i le agriculture. I le taimi nei sa i ai le manatu foi lea e toe silasila i le tulaga o le agriculture ona na o le lua vaega o lo o faamanuiaina i le vaega lea na o le vaega o le manufacturing ma le tourism.

E ala ona mafua ona avatu se lagona faapena, afai tatou te taumafai e compete ma Fiti i mea tau faatoaga, e tataua ona silasila le tatou Malo i le tulaga o le aumaiga o meafaigaluega, aua o le mea lea e toto ai le talo a Fiti, e tasi lava le palau ae toetiiti atoa le 20 talo e toto i le taimi e tasi i le masini lea. E pei o le mea lena o lea e tau avatu ai se lagona, ia taumafai e aumai se

incentive i le aufaifaatoaga, aumai se palau se i lola ai le mea, leaga o lea e lafovaio lava i le taimi lenei...

FOFOGA FETALAI: O lea ua maua le finagalo o le sui usufono.

Tofa Hon FONOTOE NUAFESILI PIERRE LAUOFO: O le vaega lenei, o la e silasila lava i ai le Matagaluega i mea o masini tetele na, e leai se mea o pogisa ai le Malo i na mea e te saunoa i ai. E malamalama lelei i ai. O le tulaga foi ia i Fiti, o lea e malamalama ma silafia le tulaga foi o i ai lenei atunuu.

Lau Afioga o le itu e fia ave ai le faatauaina, o le tulaga lea aua o lea e aumai nisi o sui usufono lea sa saunoa i mea o avanoa faigaluega, ae tatau foi ona tatou silasila i le itu lea sa saunoa i ai nisi o Minisita, e moomia e tatou le mea e tau o le skilled labour, o i la e fesootai ai foi le aufaipisinisi ma isi foi sector pei o le education. O la e i ai polokalame a le NUS, latou polokalame foi nei e aoaoina ai latou, aua a o e fai faatoaga, e tatau ona latou silasila o pisinisi mea na, e galueaiina faapisinisi. O lea foi e i ai isi polokalame e le gata i faatoaga, a o isi foi ituaiga matata eseese e pei o le uelo, o le kamuta, o le palama. O vaega uma na o lea e moomia e tatou, o ni skilled labour aua le tatou labour force. O lea la e i ai isi aoga ia pei o le APTC. O le uiga la o lau faamatalaga, e fesootai uma sectors nei.

Tofa Levaopolo Talatonu: Lau Afioga i le Fofoga Fetalai, faafetai lava...

FOFOGA FETALAI: O lea o le a uma ona avatu lea, o lea o le a fauma atu le...

Tofa Levaopolo Talatonu: E pei o le ala tonu lenei na fai atu ai se lagona, ona o lea e ao e le Ofisa o Aoga i le NUS tulaga uma ia ae uma loa o nofonono e leai se mea e faia ona o le le aumaia o masini e faatino ai skills ia na latou maua mai aoga. O le mea lenei na avatu ai se lagona lau Afioga.

FOFOGA FETALAI: Malie se i avatu muamua le avanoa i le Afioga i le Minisita mo Leoleo, Falepuipui ma Auaunaga o Tinei Mu. Tulai mai lau Afioga i le Sao Fetalai, lau Afioga Sala.

Afioga Hon Sala Fata Lisati Pinati (Minisita mo Leoleo, Falepuipui ma Auaunaga o Tinei Mu): Lau Afioga i le Fofoga Fetalai, e faafetai atu i le Minisita. I le tausaga e 1968, o Chanel sa faaoga le palau e toto ai le talo, na muamua lava faaoga e Chanel, na omai papalagi fai mai le faataitaiga e toto ai le talo. E moni, e faitau fia selau talo e toto, masalo e le atoa se afa itula ua tele le tiapula ua uma ona toto, ae sa lelei lava le io. Ma le faaaloalo lava.

FOFOGA FETALAI: E fia faasoina lou taimi lau Afioga i le Minisita, ae se i tuu atu le avanoa i le isi faauilavea lea po o se isi foi palau lea e tulai mai ai.

Tofa Aveau Tuala Lepale Niko Palamo: Lau Afioga i le Fofoga Fetalai, e leai, ou te tulai atu e momoli lau faafetai i le Afioga i le Minisita ona e fou le lauga a le Minisita, o lea ua faamuamua faatoaga. O le mea lava lenei sa

taumafai atu ai, o faatoaga lava o le backbone lea o le tatou tamaoiga. O lea la e fou lau faalogo i le lauga toetiiti lava uma le lauga na o faatoaga lava lea. Faafetai i lau Afioga i le Sui Palemia pe afai o lea ua ave lou faamoemoe e faamuamua ai tatou faatoaga, e manuia ai le tatou atunuu.

FOFOGA FETALAI: E le i taitai uma le lauga a le Afioga i le Sui Palemia.

Tofa Hon FONOTOE NUAFESILI PIERRE LAUOFO: Ioe, e le o faapea o mamafa lau lauga i faatoaga ona o lau saunoaga. A o e maua mai, o lea ou te taumafai e ave le faamamafa i le fesoootaiga o sectors, aua o le faatinoga o atinae e mafua ai ona maua galuega. E tusa o le tulaga tonu lena o lea e agai atu i ai.

A o le palau lea e saunoa i ai Sala, o la e sao, e sao, leaga o la e sa aoga nofo tumau i le Kolisi o Sanele i aso la, aua pei sa mafuli i le faifaatoaga, ma sa ou aoga ai foi au ma ou nofo tumau ai, o lea la ou te molimau atu, e sao lelei Sala ua leva ona faaoga palau, ioe. Ae o au lea ou te popole, o mea uma lava na o lea e saunoa i ai le tatou Malo i polokalame eseese ia. O la e foi e i ai fesoasoani e maua i isi vaega eseese faapena. Ae lau Afioga, o le tulaga lea o le skilled labour, e moomia lava e tatou, faafetai foi i isi sectors lea e i ai le education, ma le isi vaega lea e i ai le APTC, faapea foi le Aoga Matata Eseese a nisi o Ekalesia, e i ai le Ekalesia Metotisi faapea foi le Ekalesia Katoliko le aoga lea a Don Bosco, o i latou ia o lo o taumafai e upgrade skills a tatou tagata faigaluega ona e moomia i ituaiga atunuu tauatia e i ai le tatou atunuu i matata eseese uma ia ma skills ia. O le 2012 i le 2014, e 440 i latou na enrol ma aoaoina i le polokalame a le Aperenitisi lea sa saunoa i ai nisi o sui usufono, a o Matata Eseese lava ia o lo o taumafai foi latou e galulue i ai, o le fesoasoani a le tatou Malo, e totogi e le Malo le 50% o le pili o le Aperenitisi. E 30% e totogi e le kamupani lea e i ai le placement lea e galue ai le tama po o le teine Aperenitisi, a o le isi 20% e totogi e ia.

O le tulaga la na i ai, aua o le mea foi lena o lea e taumafai ai mai totonu o le Apprenticeship Council, o lo o i ai foi sui o Faalapotopotoga eseese ia e i ai le Inisinia, Palama ma i latou uma na e fesoasoani e galulue faatasi aua le taumafaiga o avanoa e galulue ai le au Aperenitisi i kamupani, ae fua foi i le tele o kamupani ma avanoa o lo o maua, fua foi ia i latou o lo o naunau e taumafai e o i lea polokalame. E pei o tulaga na e silasila mamao i ai ma o lo o fuafua foi e le tatou Malo lea foi polokalame. A faatusatusa Samoa i le tele o isi atunuu o le Pasefika ma le tele o isi atunuu o le lalolagi, ua matua sili ona faigofie ma faatu pisinisi i Samoa nei, ona o le fua lea o se reform ua leva ona faagaioi mai i totonu o le tatou Matagaluega o le MCIL, mo le resitalaina o kamupani ma le faatuina o kamupani. O le taimi nei, e le atoa se 10 minute e resitala ai sau kamupani, pe a faatusatusa i la aso, na o le tailua vaiaso le mea sa i ai. Ia ae sa faatinoina uma lava e loia. A o le taimi lenei, e le toe manaomia na mea, e mafai lava ona e alu oe ia resitala lau kamupani, o le faigofie ia o le tulaga ua i ai, ma faatino ai ma faagasolo nisi o fuafuaga aua lau kamupani. I le fa tausaga talu ai, na o le 160 tatou seila po o alo foi o le atunuu sa galulue i luga o vaa i fafo. O le tele lava la o le kamupani Italia o le MLC. Nei, i le taimi nei, o lea ua tilotilo i le 322 ua faaopoopo avanoa, ua maua isi avanoa ma isi galuega faaopoopo i galuega tau seila i luga o vaa faava o Malo po o le international. O le taua o lea vaega, o lo o maua mai ai

masalo po o le \$400,000 le tupe lea e maua mai ai i tatou seila, a o le tele lava la o tatou seila ia po o latou uma foi na pasi mai le aoga a le Maligi, le lala o le NUS, Iunivesite. O latou la ia o lo o galulue ma maua galuega konekarate e resitala ai i le lala o le tatou Malo i le Matagaluega o le MWTI, o i ina foi e siaki ai latou konekarate ia e galulue ai i fafo i luga o vaa. E i ai la seila a tatou nei e galulue i fafo, ua ausia nei le fuainumera 320+ a o le faamoemoe ia faatuputupulaia pea avanoa ia. O le uiga o le tala, o lea lava o lo o maua avanoa ma faaopoopo avanoa faigaluega i ia ituaiga galuega o lo o galulue ai i fafo ma o lo o lelei totogi. Aua o totogi ia e aiaia i lalo o Tulafono Faava o Malo po o le ITF, o le ITF lea e totogi i le tala Amerika tatou seila ia i konekarate tai 9 masina pe tai 12 masina ona toe foi mai foi lea i sina malologa ona faapena foi lea ona toe maua isi avanoa e toe o ai i fafo. O le Tulafono la lea o le ITF, International Transport Workers Federation, o i latou na e setiina totogi ia, ma e tataua ona usitaia e tatou, aua o tatou o le sui auai i le IMO. O le taua la o mea ia ma le Tulafono tau IMO, e tataua ona tatou usitaia ina ia aua ne i faasalaina tatou e le Faalapotopotoga lea ona aveese ai lea o tatou ma le white list. O le white list la, a faasala le atunuu ona aveese loa lea ma le white list, lona uiga, ua faigata loa ona toe maua ni avanoa o tatou seila e galulue ai i fafo. o le mea lea e taua ai foi le tatou silasila ma mataitu Tulafono ia faava o Malo ma tatou usitaia pe a galulue ai tatou...

FOFOGA FETALAI: Malie lau Afioga i le Sui Palemia se i tuu atu le avanoa i le faauilavea a le Afioga i le sui usufono mo Faleata Sisifo. Tulai mai le sui usufono.

Tofa Lealailepule Rimoni Aiafi: Lau Afioga i le Fofoga Fetalai, faafetai i lau Afioga i le Sui Palemia. O lea ua oo tonu i le isi vaega taua lea, i le mea lea sa tatou vavao ai i le vaiaso na tea nei i le saunoaga a le Afioga i le Minisita mo Faatoaga, i le leai o ni tagata faigaluega i vaa. O le mea muamua, e le o lava le intake a aoga nei, e le o taitai faamalieina avanoa mai fafo i tagata ia e aoga ma iu mai tatou aoga nei. A omai foi la tagata nei ona o lea i fafo, e leai nisi e faatumuina avanoa ia, local, i vaafagota ia ua oo mai i totonu o Samoa. Aua e le faapea e savali savali lava i le auuala sau alu ai. E tataua ona i ai se minimum level skill i mea tau faifaatoaga ma ogasami e faamalieina ai aiaiga i vaa nei.

O le fautuaga lea na avatu i lau Afioga, o le a se galuega a le Matagaluega na outou taumafai e siitia ai le aofai o tamaiti e fiafia e ave le vaega lea, grade lea, aua e le o taitai lava, e le o taitai faamalieina ai tatou avanoa lea e moomia mai fafo, aemaise o totonu o le tatou atunuu i le tulaga lea e i ai. Ma le faaaloalo lava.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai, pei o vaa ia ou te talanoa atu ai o vaa lauolua, ma meli laupasese, lea e galulue ai tatou alo ma fanau. Faafetai o lea e saunoa mai i le tulaga o vaafagota, a o lea ua uma ona tali le Afioga i le Minisita mo Faigafaiva i lea tulaga. Mo le agai i luma...

FOFOGA FETALAI: Malie lava lau Afioga i le Minisita mo Pisinisi, Alamanuia ma Leipa, se i aveatu le avanoa i le Afioga i le Minisita mo Aoga, Taaloga ma Aganuu. Tulai mai lau Afioga Magele.

Afioga Hon Magele Mauiliu: Lau Afioga i le Fofoga Fetalai, faafetai mo le avanoa. Mo le silafia e le Maota, o la e faafofoga mai le tatou Iunivesite, o tausaga uma lava e tau tutuli tamaiti. O le toatele ia o tamaiti e fia o i le seila, in fact o le lua foi vaiaso talu ai na ou fai atu i ai, se i tau control tamaiti e o i le sailors ua toatele tele. O lona uiga, e le faamaonia lea tala, o la e toatele lava tamaiti ia e fia o i tatou aoga vaa ia, ona o lea la e faatatau i galuega i luga o vaa lea na saunoa i ai le Sui Palemia, ae le faatatau i galuega ia faifaiva. Faafetai.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai, e pei o fuafuaga ia alu i luma, o lea ua faamauina lau fautuaga Leala, faafetai. A o le agai i luma, o lea la... o le a le mea o le a fai i ai? A lea toeitiiti uma ona fau le tatou Ocean Campus lea na saunoa i ai le Afioga i le Minisita mo Aoga, Taaloga ma Aganuu. Lea ua fau le tatou Ocean Campus lea e i Mulinuu masalo po o se taimi o le tausaga nei o le a tatala ai, lena o le a faaopopo ai isi avanoa e tele e aoga ai alo ma fanau a le atunuu.

A o le mea la e lelei ai le Ocean Campus lea ua faatuina nei ma fau nei, o le a oo atu aoaoga i luga o tulaga mauululuga i luga o vaa, o le a aoaoina ai le tulaga lea o le Chief Engineer, i luga i le Kapeteni. o le taimi nei, e le o mafai ona ausia tatou aoga o lo o i ai nei tulaga mauululuga na po o le vasega foi lea o le au Ofisa. Ae manatua foi la, o le au Ofisa, e mauululuga totogi. O le vaega la lena o lea tatou te agai atu ai, aua tusa na amata mai i le 160 i le fa tausaga talu ai seila e o i fafo, a o lea ua ova i le 300. O le agai la ma le faamoemoe e agai atu i luma, ia tatou faasolosolo pea i luga ia ausia se 1,000 pe sili mamao atu foi avanoa nei mo tatou alo ma fanau e galulue ai i luga o vaa.

O le uiga o lau tala lea e faamatala atu, e le faapea na o le tasi se vaega po o se sector e tilotilo i ai i le tulaga o galuega, tatou te vaavaai i le aoatetele.

FOFOGA FETALAI: Malie lau Afioga i le Sui Palemia se i vavae foe Tulai mai lau Afioga i le Taitai o le Itu Agai.

Afioga Hon Palusalue Faapo II: Lau Afioga i le Fofoga Fetalai o se mea e fia malamalama ai, malie lau Afioga i le Sui Palemia i le matagofie o au fuafuaga po o au miti. O le mea ua ou tulai atu ai ona o faafitauli lea e tulai mai i vaa fagota. E leai se fuafuaga a lau Afioga e fai ma ni vasega ia aua ai nei toe tupu mai le mea lea na tupu mai i vaafagota tetele ia ua amata ona omai. E tele galuega e maua ai, o lea ua e vaai i fafo e tataua ona e tilotilo i le faafitauli lenei e tulai mai aemaise o le mai manatu lea – e le mai manatu na seila? Ae tataua ona ave lau faamuamua i vaafagota ia lau Afioga.

FOFOGA FETALAI: O lea ua maua lou finagalo, tulai mai lau Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Ua ou tulai atu e fai sina toatele o a tatou tama fanau ua pasi mai le Aoga Seila, o isi na o i vaa ona foi mai lea malolo, ao isi e oo mai nei lava e le o mafai ona maua ni vaa. O lea foi e le nofonono matua, o le latou galuega tele lena o le o atu e vaai au ma aumai foi a latou tusi e faatalanoa mai ai se taimi e mafai ai ona o a latou fanau ua fia masina po o ua fia foi

tausaga talu ona pasi ao lea e faatalitali lava avanoa. O le galuega tele lena o lo o nafa ma le tatou Kamupani Vaa, o le tau sailia o nisi avanoa fou e ave ai a tatou tama fanau. O lea foi e tauva ma isi atunuu pei o Kiripati i le tulaga o le siitia maualuga o latou o aoaoina. O lea foi ua saunoa le Sui Palemia i le fuafuaga lena ua taoto aua sa na o tomai faa-seila ao lea o le a agai i luga i le isi tulaga o le office level le maualuga.

O le matou talanoaga ma Vaa ia i Tutuila, o le masina o Oketopa e faamaea ai feutagaiga ma le Kamupani Fagota foi lea a le Bumble Bee, o le mea lea ua latou laga mai o kapeteni uma lava o vaa nei e faatautaia vaa fagota i Tutuila e o atu uma iinei, o tama fanau uma a tatou na pasi i Aoga Seila. O lona uiga o lea e tele lava le avanoa, o lea foi e fai le galuega a le Malo o le faaaooaga o a tatou aliivaa a o la e fai le galuega o le saili avanoa i fafo i vaatetele, vaatetele foi nei o Cruise Ships, e toatele a tatou tama fanau o lo o feoai ai luga o vaa i Europa ma Medditeranian o lo o galulue ai.

O le tulaga lena, e le o nofonono le Malo i fesoootaiga e faia pea ma i latou i fafo, ina ia maua ai avanoa a o tatou tama fanau. Ua toeitiiti uma le Faleaoga fou lea e tau faamaea nei, o le tasi lena laasaga tele mo le agai atu i luma, o lo o faia le tauvaga a o tatou tama fanau ma isi foi tama fanau aemaise lava atunuu o le pasefika, o le tasi foi lena mafuaaga e mamafa ai lava le tuualalo ia tatou tama fanau ina ia faamaoni, aua e le na o tatou o la foi e tauva i nai avanoa nei o lo o maua. A o le tulaga lea e taua, o mea lava na e tutupu, e le mafai ona tatou teena aua e le fou nei le mataupu lea, e i ai lava isi e le fia umi ona o i fafo pea umi tele ona o e fagogota. E le o se mea fou e aafia ai lava lo tatou alii fai vaa ae le i omai vaa tetele ia, na lavea ai lava i le mataupu lena o le mumusu o kapeteni le vaega lea ua aoaoina, i le uumi ona o vaa i fafo, o le ala lena e le umi ai na o ae toe foi, o ma toe foi.

Lau Afioga o le toe fesoasoani atu lena e faamatalamatala atili vaega o lo o faafeagai ma le Malo.

FOFOGA FETALAI: Malo faafetai, ou te manatu ua manino atili lea – malie lava lau Afioga i le Sui Palemia sei avatu pea le avanoa i le Minisita mo Faatoaga ma Faigafaiva.

Afioga Hon Le Mamea Lemalu Su'a Leatuavao Tuiletufuga Ropati Mualia: Lau Afioga i le Fofoga Fetalai, faafetai mo le avanoa leaga o lea ua toe afe foi i seila o vaa fagota. Mo le silafia e le Taitai o le Itu Agai, o lo o fai aoga foi nei o safety mo seila o vaa fagota. A tau vaa fagota e le lavea ai na o vaa tetele ia e omai, e lavea ai foi tatou alia. O le mea e popole ai le Matagaluega o le toatele o nisi ua faamaumauina le soifua ona o le le silasila totoa i le tulaga o le saogalemu i luga o le sami. O lea la e tau atu o lo o fai aoga i le NUS, e ese a seila i vaa tetele ese foi le vaega lea o matou i le itu o le fagota o lo o fai foi a latou courses i le NUS. Aua a laisene lou vaa e tatau ona satisfy uma mea ia o le ualesi ma mea uma tau safety ao le faalavelave o o tatou tagata e oo atu loa i tai tape uma na mea e fiu lava e le toe kea i ai a ua kea i le ia. O le aoga lena o courses o lo o faia i le NUS mo le aufaifaiva, ae ou te tau atu o le matua toatele o le aufaifaiva o le matua lava ao isi ua le fia o ua uma mai lava ma o fai maumauga ae masalo a silasila loa i totogi nei ua offer mai e vaa tetele nei o le a toe fia o uma loa i le sami.

Ma lou faaloalo lava faafetai.

FOFOGA FETALAI: Malo faafetai fesoasoani mai i lau Afioga i le Minisita o Faatoaga ma Faigafaiva. Tulai mai lau Afioga i le Sui Palemia e faauau lau saunoaga.

Tofa Hon FONOTOE NUAFESILI PIERRE LAUOFO: Faafetai i lau Afioga i le Fofoga Fetalai, ia o galuega uma ia i luga o vaa, lea foi na i ai le tatou faiga paaga o le tatou PFL ma le Kamupani lea o le NEPTUNE, lea ua fanau mai ai le polokalame faasikolasipi lea na filifilia ai tama aoga e toalima mai le NUS i le Aoga a le Maligi (Marine Training) lea ua ave e koloni ai, e toatolu e sifi inisinia ae toalua e koloni faa-kapeteni mo vaa lauolua tetele nei, o le polokalame masalo po o le lima tausaga e faagasolo ai lea polokalame. O la ua o e galulue i luga o vaa i le taimi lenei e fai ai le mea foi lea e taua o le sea time ma le faamoemoe a oo loa ina tatala le tatou Ocean Campus lea ona omai foi lea po o le ono masina po o se taimi faapena e fai ai le latou theory i i ona toe o foi lea i luga o vaa ae po o le lima tausaga o le polokalame. O tulaga o fuafuaga lelei na o lo o i ai lava avanoa nei o lo o taumafai i ai le Malo.

O le tulaga o oloa e auina atu i fafo e sao, e le o malolo foi le Malo i le tulaga o fesootaiga ma feutagaiga faava o Malo ina ia maua, pe ave Samoa ma sui auai o feagaiga faava o Malo i le tulaga tau fefaatauaiga. O lea na taua e se tasi o sui usufono le EPA po o le Economic Partnership Agreement lea ua tele tausaga o tau faamaea ma le va o le EU, o le taimi nei o lo o i ai le entering o lo o sainia e Peretania ma Europa, o le entering pei o se feagaiga tumau, ae mafua lenei tulaga ona o le manaomia e Europa o le ia lea e auina atu e Papua Niu Kini, e i ai foi la ma le entering ma Fiti lea na saunoa i ai le sui usufono, e mafua ona o le suka a Fiti e manaomia i Europa, ao feagaiga le tumau o le taimi lenei e faatalitali ai le feagaiga po o le comprehension o le EPA o se taimi muamua ona faamaea lea, ao lo o fuafua lava i le avanoa mai o Europa po o le European Commission i feutagaiga nei, ona e fai sina pisi o i latou i luga i Europa ao lo o tele lava avanoa a tatou iinei i le Pasefika, o le feagaiga la i le va o le Pasefika ma Europa, ao lo o tele isi feagaiga ua maea e pei ona silafia le PICTA ma PACER faapea foi le WTO o lo o faafaigofie ai ma maua avanoa faapena.

Lau Afioga i le Fofoga Fetalai, sa fesiligia e se tasi o sui usufono le lisi o le tau o oloa i le faleoloa lea e i Vaisigano o le KK Mart. E sao, sa ou sau foi ou ave ma ou tilotilo i ai e lua lisi lea na taua e faapea o le lisi paepae ma le lisi piniki, ae manatua foi na ou faamatalaina le process i le isi foi a tatou Fono talu ai, o le galuega lea i lalo o le Tulafono e tai tolu masina ma toe Iloilo le tau o oloa o basic food stuffs o lo o i luga o le lisi lea. Na ou sau ou tilotilo i ai e manino lava le tulaga e pei ona i ai, e alu i aso o lo o i luga o le lisi le tau o oloa.

O le lisi lanu piniki lea sa taua e le sui usufono, o le lisi lenei o le aso 8 Me 2015, o le current list lenei o lea e faaogaina i le taimi lenei, ao le isi lisi paepae o le aso 30 Ianuarui 2015, o lona uiga o le isi tolu masina ua tuanai. O le faamalamalamaga lenei o lo o manino i luga o le lisi o tau o oloa o lo o faapipii i luma o faleoloa.

O le child labour lau Afioga i le Fofoga Fetalai, o lo o aiaia i lalo o le CRC, Convention on the Right of the Child, a silasila i ai isi fononua a le ILO po o le Labour International Organisation lea e masani ona usufono ai sui o le tatou atunuu, e matautia le mea o lo o tupu i fafo i isi atunuu. O mea nei o Child

Labour i fafo, o ata e faaali o fale gaosi oloa tetele po o factories e galulue ai nai alualu toto, o isi fale tetele pei o le maketi lea i Fugalei le tele, ae tutu mai lava i le taeao e oo i le po o galulue nei tamaiti, ae galulue i le leai o se totogi, e tumu i le fia afe ma afe o tamaiti, pau lava le mea e ave i ai o taumafa ma fafaga. O le child labour lena o lo o tupu i isi atunuu o le Lalolagi, e matautia le mea o lo o tupu, ao nei ia tatou o le isi RC lea o lo o vaavaaia e le Matagaluega o Tina ma Tamaitai, Atinae o Nuu ma Afioga ma Agafesootai o i latou na, o le taimi nei o lea o lo o galulue nisi o le tatou Matagaluega e tau tuufaatasia se employment policy mo tatou, o i ina e i ai le faamoemoe o le a kava ai le mea lea e tau o le Child Labour. E le i mamao atu nei na faia ai se Workshop i Samoa sa faafae e le ILO, i le tulaga tonu lea e tau o le Child Labour, masalo e le o toe mamao ona maua mai lea o le latou Lipoti atonu e maua mai ai ma ni fautuaga taua ma le aoga ma sei tatou silasila foi i ai po o a ni tulaga anoa o aumai ai i lena Lipoti mo le agai i luma. O le vaega lena e pei ona faailoa atu, e le o pau i le Malo o lea foi e silasila i ai le Malo o se aso o i luma ona oo mai lea o le Tulafono lea na aumai e le sui usufono mo Faleata Sisifo, o le Competition and Consumer Protection Bill, faafetai silasila mamao, ae sei oo mai ona ou tautala faamalamalama lea i ai.

FOFOGA FETALAI: Malie lau Afioga i le Sui Palemia se i avatu le avanoa i le sui ufuono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, ona o lea ua see ese le Afioga i le Sui Palemia i le vaega tonu lea na ou talanoa atu ai o le Child Labour, ou te lagona e le o le Child Labour le sense lea tatou te talanoa i ai, i think o le mea e tatau ona tilotilo i ai o le Child Protection ma le prevention mai mea ia o lo o fai nei. E pei ona e saunoa ona o le taimi nei e leai ma se Tulafono e puipuia ai tamaiti mai le faatauina o oloa i le taulaga i taimi le talafeagai lea na avatu ai le fautuaga. O lea na e saunoa mai i mea o lo o tutupu i isi atunuu, e oo lava i ai tatou pe a le vave faatinoina se Tulafono e puipuia ai lea vaega, aua ua tatou iloa o tamaiti uma lava nei e faatau oloa i le auala e tatau ona o i le aoga ma tulaga faapena. Ao le fesili lea e tulai mai ona e le o i ai se Tulafono e manino ai e puipuia mai ai tamaiti mai le faatau faasavali oloa i le auala i taimi le talafeagai.

FOFOGA FETALAI: Mo le faasaoina o le avanoa o lau Afioga i le Sui Palemia, se i tuu atu le avanoa i le isi sui usufono mamalu.

Afioga Tafua Maluelue Tafua: Lau Afioga i le Fofoga Fetalai, e le fia faalavelaveina foi le saunoaga a le Afioga i le Sui Palemia, i le tulaga o le lisi o le tau o oloa lea na e saunoa i ai o au sa laga le mataupu lea ae pei a ua see laitiiti atu ea ae malie lau Afioga o le agaga faafetai na ou laga ai ma le agaga faamalo i lau Matagaluega ua talia le fautuaga a la matou Komiti i le Tulafono sa matou fautuaina ai muamua e suisui le lanu o le tau o oloa mai lea masina i lea masina po o le tai kuata lava ma sui. O le ala lea na ou laga ai ona o le faafetai ua talia le fautuaga ina ia sui le lanu, ona pau le mea na ou toe laga ai ma le faaaloalo lau Afioga, ona o le lua o lisi sa i ai le manatu e o atu nisi e monitor ma aveese le lisi tuai o Ianuari ae tuu ai le lisi o Me, ao le agaga faafetai ona ua talia le fautuaga a le Komiti na avatu i le Matagaluega

ina ia suia le lanu o le pepa o le lisi o oloa mai lea tolu masina i le isi tolu masina. Faafetai.

Tofa Hon FONOTOE NUAFESILI PIERRE LAUOFO: Faafetai i le saunoaga a le sui usufono mamalu, pei e i ai foi le taua o le faaipii o le lisi lea e sosoo mai ma le isi 3 masina i le isi 3 masina po o le a le oloa ua pau le tau ma le oloa ua sii lona tau e le faapea e tumau ai lava i le tai tolu masina. O le mafuaaga lena e toe lilo ai le lisi o le tau o oloa i le tai tolu masina ma toe faatino lena tulaga ina ia manino ma silafia e le atunuu oloa ua sii ma oloa ua pau le tau. O le employment policy tonu lava lena ma le agaga e fai ai le tatou employment policy, o i ina e faavae ai se tatou Tulafono pe a manaomia i le tulaga tonu lea na saunoa mai ai le sui usufono mo Faleta Sisifo.

O le vaega lena e pei ona tau faamatalatala atu lau Afioga, o lea ua tau faaii atu lea vaega e faalagi faapea o le Child Labour, o lea ua mautu nisi o vaega, ua uma foi ona faamatala i nisi o a tatou Fonotaga. Ua saunoa manino foi le le Minisita mo Aoga, Taaloga ma Aganuu i le galuega o lo o taumafai i ai i taimi o aoga. O lo o galulue lagolagosua faatasi ai foi le Matagaluega o Leoleo ma Falepuipui ma isi Matagaluega talafeagai o le Malo mo le faamalosia o le tatou Tulafono. Ae malie ai saunoaga a nisi o sui usufono mamalu, o le tiute o matua ia faamamafa pea lena, o le tiute o matua o le ave o fanau i le aoga.

Lau Afioga i le Fofoga Fetalai, ou te faafetaia le tapuaiga a lou Itumalo, ua faamalo le tapuai, faafetai le tatalo..

Tofa Lealailepule Rimoni Aiafi: Lau Afioga i le Fofoga Fetalai, e maua atu o le a faaii le saunoaga a le Afioga i le Sui Palemia ae tele nai mataupu nei sa laga. Lau Afioga e le i oo lau saunoaga i le mataupu e uiga i meaai mai fafo ma labelling lea na talanoa atu ai. O le tele o meaai e leai ni label faainilisi, na o le faa Saina ma le a... o lea ua i ai le Tulafono ae leiloa pe faapefea ona faamalosia.

O le isi mea ua ou vaai atu i le nusipepa ua faasalalau mai ai le fale sikareti numera lua lea e tau fuafua e fai. E fou i le vaai lea mea po o le a le tulaga o i ai ae po o ua silafia e lau Matagaluega? E tele lava nai mea ao lena o le a faaii mai lau lauga ae afai ua uma ia sei oo ia i se isi taimi pe afai o lena.

Tofa Hon FONOTOE NUAFESILI PIERRE LAUOFO: A e maua mai le uiga o le aotelega o lena ua tali uma atu ai ma le mataupu lena e te saunoa mai ai. Ae atonu o se taimi, ou te le i malamalama i le fale sikareti lea e te saunoa mai ai e le i oo mai ni pepa i luga o lau Matagaluega, atonu o se taimi ona saunoa lea o le Palemia ae masalo e leai se mea i lenei taimi ua faatuina.

O le tatou vaega tonu lena ua i ai, ae ou te le i see ese na ona toe faamanatu le vaega lea meamanu o manatua, o lo o galulue le Matagaluega o Tina ma Tamaitai, Atinae o Nuu ma Afioga ma Agafesootai i le Child Protection Bill, e i ai le Tulafono Tau Faaofi lea ua tapena mai i le taimi nei, e agai tonu lava i le Child Labour e pei ona taua e le sui usufono.

Afioga Hon Aeau Penimanina Leavaseeta: Ma le faaaloalo lava i lau Afioga, ou te musu lava e faalavelave i mea faapea ae tatau lava ona amanaia le mea lenei. Ae pe mafai lava ona e saunoa manino mai, o le mea lea o le Child Labour lea tatou te talanoa i ai o le manaia ia o le Tulafono, matua aua

nei faia, Ofisa o Leoleo e vaai ao la e i ai, see the point lau Afioga i le Fofoga Fetalai, po o i ai se isi faiga a le Malo e mafai ona faatino ai? Aua o tatou uma e faalogo ai ae leaga lava sei tulou, e le lelei ae tatou o atu i i ae laga mai tamaiti, e i ai se isi faiga e fai ai pe leai? Pe na ona faaleo e tatou a o ai e faatinoina tonu lava? Faafetai lava, leaga o lea e tupu.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai, o lea ou te vaai atu i au faamaumauga e le i saunoa le sui usufono i le Child Labour, ae ui o lea o le galuega o ai e faia? E fai uma lava e tatou. O ai e faia e fai e tatou uma lava. O le tatou responsibility lena o i tatou o matua agai i fanau, e leai se isi tatou te famoemoe i ai.

Lau Afioga i le Fofoga Fetalai, ona ua ou vaai atu i le taimi ua tatau foi ona faaiuiu ma ua uma ai foi mataupu sa laga e sui usufono mamalu e uiga i lenei sector. Faafetai atu i le tapuaiga a lou Itumalo, faamalo tatalo faafetai le tapuai. E faaoga foi le avanoa e avatu ai le tulaga o le upu faamalosiua mo la tatou 'Au mo lea vaiaso, le tatou 'Au, ia alo ane i outou faiva, alo ane e fai se mea e tautau ai Samoa o lea e tapuai le atunuu. Ia manuia lo outou faiva ma ia manuia la outou taaloga.

Ia faamanuia le Atua i lau Afioga i le Fofoga Fetalai, lenei Itu o le Maota ma lena Itu, Failautusi o le Fono faapea Ofisa Sili o Pulega o Matagaluega ma le aufaigaluega a le Malo. Ia manuia le Fono.

FOFOGA FETALAI: Malo faafetai i lau Afioga i le Sui Palemia, malo le onosai, malo le tauatai, malo le galue, e ui lava ina le i laga i lauga a sui usufono ae faamalo lava le tali faaaloalo, e leai se isi e agai i ai e tupu matagi i liu o vaa. E momoe, momoe, ala mai lau mai ae le afaina e aoga foi e faatupu manatu.

Ae tulai maia lau Afioga i le Palemia mo le Lafo.

LAFO MO LE SUIA O ITULA FONO

Susuga Hon TUILAEPFA FATIALOFA AUELUA LUPESOLIAI AIONO NEIOTI SAILELE MALIELEGAOI: A o lei fai atua le Lafo lau Afioga, o mataupu uma lava e pei ona matauina sa ou amata mea i le taliina o fesili ona lafo atu lea i le Kapeneta ae ou toe faaii mea. E toalua Minisita ia ona o lo o i ai tuatuaiga ua le mafai ona oo mai, o Mataupu uma e faasaga i le Palota i lalo o le vaaiga a le Minisita mo Faamasinoga ma Pulega tau Faamasinoga, faapea foi Mataupu tau Faalapotopotoga Tumaoti lafo mai, taatia mai. O lea ua uma ona ou tilotilo i ai, o le taua ia o manatu na aumai e faatatau i le Palota. Na amata mai lava i le Aso Faraile ona ou tilotilo i ai ma ou tatalo ma ou mafaufau loloto i ai, ou te manatua le mataupu lea i le aafia soo o tatou ma ave i fafo e tusitala o le atunuu lena e corrupt ana Faiga Palota. Ua fiu foi le Kapeneta e finau atu i le tulaga o le Tulafono, i le tulaga o oo mo sina faataitaiga. O le vaaiga faa-Faamasino, e fai loa oo a ua tu lata i le Faiga Palota, o faiga corrupt na. E tasi lava le mafuaaga, e tasi lava le faiga e le mafai ai ona toe ta'u amio piopio Taitai o le atunuu o le aua nei toe faia ni oo ao lumanai le Faiga Palota. A uma loa le Faiga Palota ona faatoa fai loa lea o ni oo. O le vaaiga lena faa-Faamasino faale-Tulafono, ona pau lava lena o le mea e vaai mai ai le Tulafono e mama, ia fai i le 12 masina ina ua uma le

Faiga Palota, ao faiga ia sa tatou sau ai toe o ni nai aso fai le Faiga Palota ae fai, o faiga piopio uma lava faiga na. Se ua soo le lalolagi o tau matilatila ai le solitulafono o Taitai o Samoa ona o le faiga lenei, o le ala foi lenei lea ua ala ai ona le maalofia le faatulafonoina seia uma lelei lava le Faiga Palota, ona faatoa fai loa lea o le oo. O lona uiga, ona pau lenei o le Faiga Palota o le a le toe i ai ni moliaga e faasaga i le mea lea. Ua ala ona ou taua lea mea ona o manatu ia na aumai e faatatau i isi aiaiga ia o le Tulafono, e ese a le mea tatou te mafaufau tatou i ai, ese le vaaiga faale-Faamasinoga. O le mea lea e le mama ai ia te au vaega ia.

Lau Afioga i le Fofoga Fetalai, o nisi lava mataupu ua uma ona ou tali atu i ai ma ua ou manatu ai tatou o loa e Auiliili le Tala o le Tupe.

Lau Afioga i le Fofoga Fetalai ou te faatu le lafo, *Ina ia faataatia ese le Tulafono Tumau 30(1), ina ia avanoa ai le suia o Itula Fono i itula nei e amata atu i le aso mai le 9:00 i le 1:00 ma le 7:00 i le 11:00 a nanei e amata ai ona auiliili le tatou Tala o le Tupe.*

Faaluaina e le Sui Palemia ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo.

FOFOGA FETALAI: Ou te manatu o le tualuga lenei o le tatou Galuega i lenei aso, o lea ua sulu tau i le tini, ua tini tauao foi le tali atu o le Malo i tuleiga ma saunoaga a le paia ma le mamalu o le tatou Palemene. O le tulaga sili lenei ona momoli atu ai le agaga faafetai tele i le Malo i lenei taeao.

O lea foi ua saunoa malamalama le Afioga i le Palemia, o tuleiga ma saunoaga e ala i nisi o Minisita ua le mafai ona auai mai, o lea ua lafo i le Afioga i le Palemia ma faamalalamaina e pei ona i ai atugaluga i finagalo o sui usufono.

O lea foi ua faatuina le tatou lafo, ou te manatu o le avanoa lelei lenei se i vasai foe ae tatou agai e fai nisi fuafuaga i le taimi lenei seia paia le itula e 7:00 ona tatou toe potopoto lea. Ou te talitonu foi o se faautautaga ua tata mo i tatou ona o lo o i ai nisi o tuatua ma faalavelave le maalofia, o mea faafuasei i le malaga a le maliu ma le oti e tata ona auai nisi o outou o lea faatoa taunuu mai i le Maota, e talitonu o le a tatou toe potopoto i nei i le tatou Fonotaga i le afiafi a nanei.

O lo o ua saunia le tatou taumafataga e tali ai la outou sua a o lei malolo, o lo o i ai foi nisi o a tatou faasilasilaga i se tulaga taua. E i ai le tulaga o a tatou fonotaga a taeao ae se i maua le faamaoniga ona ou aveatua lea o le faasilasilaga. O lenei taimi e momoli atu le faafetai tele i le tatou Fono, faafetai foi i le tapuaiga taotaotua a alii ma tamaitai aemaise o Ofisa Sili o Pulega i Matagaluega o le Malo i tupu ma ee malo le onosai i lenei taeao.

E faasilasila atu o le a tolopoina nei Tualumaga a le Fono Aoao seia aulia le itula e 7:00 i le afiafi a nanei.

Na faataatiaese Tualumaga a le Fono Aoao i le itula e 12:59 i le aoauli.